

Nk'oku Naabaire Ndi Na Musa, Nikwo Ndigungma Naiwe

Jeffersonville, Indiana, USA
Okwamwenda 11, 1960

1 Okugaruka aheeru akasheeshe aka . . . [Omwanya oguriho busha aha rutambi rw'amaraka -Omur.] . . . oturo twa nyekiro. Nyine amatsiko ngu twena tutugizire, kandi eriizooba nituhurira twena turuhukire.

Naaba nintekateeka, obu naaba nyemereire omu kishengye, kandi Billy Paulo yaahitsya emyaka makumi abiri n'etaano, akasheeshe aka. Niinyijuka nyemereire aha kituuti eki kyonyini, obu . . . Frankie Weber, omutaahi hanu, nyowe nawe tukeega hamwe. Kandi nkaba nyine nk'emyaka makumi abiri na gumwe, nka makumi abiri n'ebiri, nintekateeka. Kandi we akaba yaahikize emyaka makumi abiri n'etaano. Kandi ku yaahikize emyaka makumi abiri n'etaano, naateekakateeka nti, "Oo, mugyenzi! Frankie ari haihi kufa! Akuriire kimwe. Reero-reero hati," naateekateeka nti, "ndyaba nta ku ndihitsya egyo myaka, makumi abiri n'etaano?" Mbwenu hati mutabani wangye yaahtitsya emyaka makumi abiri n'etaano.

Ekyo nikyoreka ngu obwire nibwiruka juba, kandi tihariho n'omwe ou burikutegyereza. Tushemereire kukora bukiri nyomushana, ahakuba obwire nibwija obu turiba tutakibaasa kukora bundi. Kandi obutoosha nkaba nkunda "Zaaburi y'Amagara" ya Longfellow erikugira eti, "Kandi twataana, tutsigye enyima yaitu endibatiro aha musheenyi gw'obwire." Nituteekwa kutaho endibatiro obu turikubaasa kuzitaho, buri omwe omuriitwe. Ka turekye kufiisa busha ekiro na kimwe, kureka tukore buriizooba turihindure ery'omugasho munonga nk'oku turikubaasa, Kumuhaisa ekitiinisa.

2 Ebiro bikye ebihingwire, nimmanyisa saabiiti ibiri ezhingwire, nizo ezirabireho. Mukama aha okworekwa, nk'oku ekyo twena turikukihama hanu. Nkatunga okworekwa okutari kwa burijo obu naabaire ndi eifo omuri Kentucky. Naagambira ekibiina eki naabaire ndi nakyo nti, "Buzima hariho ekintu ekirikwenda kubaho."

Nkareeba omumaisho gangye heemereireho, nka shaaha mwenda nyekiro, omu kishengye, omushaija, nairagurira kimwe omu muringo ogurikutiinisa; atarikwiragura nk'ab'eishe-emwe n'ab'eishe-emwekazi abairaguju bagyenzi baitu abakundwa. Ogu mushaija akaba aine omutaano. Omubiri gwe gukaba guri ekyoma gwine emifunya. Kandi akaba ariyo naija n'engaro ze z'amaani zeetegwire kumbakura, kunkwata. Kandi nkaba nyine akasyo kakye k'okundinda, kwonka kakaba katarikugasha. Kakaba katarikubaasa kundinda. N'ahabw'ekyo, haagira oku kyaba, Mukama yaataahamu, yampwera yankiza eki kishaija ekirikutiinisa. Akaba ari ekyoma ekiine emifunya. Nkamureeba ariyo naimutsya omukono gwe, emifunya mingi aha mubiri gwe, nk'ekyoma kirikutoora oku n'oku. Ningira ngu, obundi, eisasi ry'amaani tirikaabaasize kufumura ekyo kishushu ekirikutiinisa, nk'ekikooko, akanyankogote nari ekindi kintu, ekimushwekkire. Kandi akaba aizire kundwanisa. Ekyo nimmanyia amakaru gaakyo kandi n'eki kirikumanyisa.

3 Kwonka, kandi, ekiro ky'Orwakabiri oruhweire, nka shaaha mwenda z'ekiro, hariho ekindi ekyabaireho. Nkaba ndi omu ka. Reero Ruhanga Wenyini yanyemerera omu maisho ndi omu kishengye, yaagamba ebigambo ebi ntareetegyereize. Kandi obwire obu Yaataireho bwiriire haihi. Kandi Tindamuhuriire kurungi munonga, kwonka Akaba ari Ruhanga Wenyini. Reero yaagira ati, "Ebidi biro mushanju, noozza kwemerera nk'oku Musa yaayemereire," nari, "noozza kuba nk'oku Musa yaabaire ari," nari ekintu ekikwatsire ahari Musa. Nimburwayo ekindi kiro kimwe, bwanyima y'ekiro eki. Okwo kubaire okwa mukaaga. Tindikumanya ekyo eki kirikumanyisa. Nimmanya ngu Naaza kukikora, kyona eki kiri. "Nooza kwemerera," nari "nooteekwa kwemerera," nari "obe nka," nari ekintu ekyabaire kikwatsire ahari, "Musa." Kandi tindakiteekateekireho munonga. Nkagambira ab'omu ka yangye kandi naagambira nkunzi zangye, zimwe, ku ndeebire Ruhanga. Beitu kandi, Akaba naagamba nk'omuntu.

Kandi nyetegyereize ngu Obutumwa bwangye, obwa nyomwabazyo, Mukama anyikiriize kutoorana Musa. Kandi, akasheeshe aka, ni Musa n'owaamuhunguriire. Kandi Ekyahandiikirwe eki ndi haihi kushoma, akasheeshe aka, ahabwa, kikwatsire ahari Musa na Yoshua. Kandi Ekyahandiikirwe eki, Yoshua eshuura 1, obutoosha kituura kiri Ekyahandiikirwe ky'omutaano munonga. Tinkakibuuriragaho, omu magara gangye; naaza kukigyezaho, akasheeshe aka.

4 Kwonka, nk'emyaka ebiri ebingwire, nkareeba Baiburi, ndi omu kishengye, neeshuma neeruga ahaiguru yaaza ahu naabaire ndi. Reero Omukono, gwaruga ahaiguru, gwashuma gwataanuura empapura, gwazibiikuura; kandi gwagumizamu gwahika, ahari Yoshua 1, aha mushororongo gwa 9, gwayemerera, nigugyenda mpura. Ntwire ntegyereize obwire obu kuhika, obu naakwehuriramu ngu n'okukunda kwa Ruhanga kukibuuriraho.

Hati, mureebwa zaasaaviisi z'omwebazyo, ku muraabe . . . nimubaasa kwija, mwaba mutaine murimo. Ku muraabe mwine amakanisa agarikubeetenga, ahabw'enki, buzima nitubahabura kuza omu makanisa gaanyu.

Nituza kushabira abarwaire akasheeshe aka, ahonaaho Obutumwa bwaheza kuhwa. Kandi nintekateeka ngu, aho, ekiraakuratire ekyo, ni saaviisi y'okubatiza.

Kandi ekiro eki, Mukama ku araakunde, niinyenda kubuurira aha Binto Bitaano Ebihikire By'Ebyahandiikirwe By'Okumanyiraho Ekanisa, kandi n'obuzaare bwaitu Nabyo, hamwe n'Ekanisa y'Endagaano Ensyia, kandi n'obuzaare bwaitu n'Ekanisa egi. Kandi zaasaaviisi niziza kutandika, na saaviisi y'ebiyeshongoro, shaaha emwe n'edakiika makumi ashatu; ninza kugyezeho kuza aha kituuti shaaha ibiri. Kandi nituza kumara shaaha ishatu n'edakiika makumi ashatu, Mukama ku araakunde.

5 Kandi niinyesiga ngu, eriizooba, tiharaije kubaho kigambo na kimwe omu bigambo ebi, eki, ku ndaahikye aha kutumwa, tiharaije kubaho n'omwe oraaremwe kukireeba. Ahabw'okuba, ni kikuru munonga kugira ngu ote aha rubaju buri kintu hati, reero oteekateekye, obwo tutegyereize Omwoyo Orikwera.

Tutakashomire Ekigambo eki ekirikutangaaza kandi ekirungi, naaza kushaba munywani wangye omurungi, omukozi ou turikukwatanisa hamwe, Dokita Lee Vayle, ku araabe naabaasa kwemerera akatwebembera omu kushaba, obwo turiyo nituza kubiikuura Ekigambo. Ow'eishe-emwe Vayle.

[Ow'eishe-emwe Lee Vayle yaatandika kushaba. Omwanya oguriho busha aha rutambi rw'amaraka -Omur.]

Yebare, Ow'eishe-emwe Vayle, ahabw'egyo shaara y'okwikiriza ahari Ruhanga.

6 Mbwenu hati ka tubiikuure omu Byahandiikirwe. Hariho bingi munonga by'okugambaho; kwonka kandi ahabw'okureeba baangi beemereire beegamiire ebisiika, n'omu bishengye, n'ebindi nk'ebyo. Niinyikiriza ngu turi haihi kutaaha omu kasheeshe k'ekiro kisya. Hati, omu kushoma Ebyahandiikirwe akasheeshe aka, ka tubiikuure omu kitabo kya Yoshua eshuura 1. Kandi twaza kushoma omu Kitabo ky'okubanza kya Yoshua, eshuura y'okubanza, emishororongo mwenda ey'okubanza. Obwo turiyo nitweteguura . . .

Obutumwa obu buriyo nibukwatwa aha ntambi z'amaraka, kandi nibuza kwoherezibwa omu bicweka bingi by'ensi. Nkaayenzire ngu abantu b'omu nsi . . . abu Mukama ampeereiremu obuganzi, kandi nkagirirwa embabazi omu maisho gaanyu. Ningamba eki, akasheeshe aka, ahabw'okuba ngu, omu biro by'omu maisho, nyine amatsiko kwija omu bashomi baanyu n'enteerane zaanyu, kugira ngu mubaase kumanya, obwire butakahikire, ebi Mukama Ruhanga akozire, kugira ngu mubaase kumanya Amazima. Kandi nk'oku Yesu yaagambire ati, "Amazima garyabahindura ab'obusingye."

7 Nitushoma omu kitabo kya Yoshua 1.

. . . bwanyima y'okufa kwa Musa omugaragwa wa MUKAMA, MUKAMA akagambira Yoshua mwene Nuuni, omuheereza wa Musa, ati:

Musa omugaragwa wangye afiire; n'ahabw'ekyo imuka, oyambukye omugyera ogu Yorudani, iwe n'eihanga eri ryona, mutaahe omu nsi ei ndikuha Abaisraeli.

Omwanya gwona ogu muriribatamu, ngubahaire, nk'oku naagambiire Musa.

Okuruga aha ihamba n'orushozi oru Lebanooni, okuhika aha mugyera omuhango Furaati, ensi yoona ey'Abahiiti, . . . okuhika aha Nyanja empango ey'oburengyerwa-izooba, egyo niyo eriba emyatano yaanyu.

Tihaine muntu weena oribaasa kukuza omu kasos ebiro byona eby'amagara gaawe; nk'oku naabaire ndi na Musa, nikwo ndigunga naiwe; tindikuhemukaho, kandi tindikutsigaho.

Ba ow'amaani, ogume omutima; ahakuba niwe orihunguza eihanga eri ensi ei naarahiire kuha baishenkurubo.

Kwonka ba ow'amaani, ogumire kimwe omutima, kandi oyerinde ohitsye ebiragiro byona ebi Musa omugaragwa wangye yaakuragiire; otaribiteishukaho kutoora aha rubaju rwa buryo nari orwa bumoshio, obone kubaasikirwa, ei oriza yoona.

Ekitabo eki eky'ebiragiro kitarikuruga omu kanwa; kureka ogume nookiteekateekaho nyomushana na

nyekiro, obone kwerinda, ohitsye byona ebihandiikirwemu; obwo nibwo oriheebwa omugisha ei oriza yoona, okabaasa gye byona.

Tiinye naakuragiira? Ba ow'amaani, ogume omutima; otatiina, n'obu kwakuba okuhahaaza omutima; ahabw'okuba MUKAMA Ruhanga waawe aryaguma naiwe ei oriza yoona.

8 Omu mushororongo gwa 5, kandi nka rwagati y'ogwo mushororongo, kihandiikirwe ngu: Nk'oku Naabaire Ndi Na Musa, Nikwo Ndigunga Naiwe. Eryo niryo, ku naakuryeta eishomo, nkaayenzire ku-kubuuriraho akaanya kakye, kandi nimbashaba kuritaho omutima. Nk'oku Naabaire ndi na Musa, nikwo ndigunga naiwe.“

Hati nyomwabazyo tubaire nitugyenda n'Abaisraeli, okurugira kimwe Misri, okuhitsya obu tubahikize omuri Kadeshi. Oo, ka n'eishomo rikuru! Ka n'ekintu kikuru, nk'oku tushushaniriize ekanisa y'omubiri hamwe n'ekanisa y'omwoyo. Ruhanga naakoragana n'Abaisraeli omu by'omubiri; hamwe n'ekanisa omu biro ebi, nk'oku Ariyo naatoorana abantu omu Banyamahanga, okuba eihanga erirkwetererwa Eiziina Rye. Naakoragana nabo omu buryo bw'omwoyo, nk'oku Yaakoragaine nabo omu buryo bw'omubiri; nibishushana, byombi. Byona ebi Ruhanga yaakozire nabo, na byona ebi Ruhanga yaabakoreire, kandi na byona ebi baakozire nibaihura, nabituhikaho nk'ebi'okutuhabura. Kandi nitireeba, ahi twahika, Ekigambo kihikiiriziibwe omu muringo nigwo gumwe buzima. Oku ngu omu by'omubiri, ku baasingwire, bakye, bakashutama baashemererwa, baateera akaari, baazina, kandi baahimbisa Ruhanga; buzima nk'oku ekanisa yaakozire, mbwenu hati emazire emyaka makumi ana etegyereize okushuururwa kw'ekindi kintu.

9 Twaba nituteekateeka ahari Musa, ogu mugaragwa mukuru wa Mukama, oku aha kuzaarwa kwe, omwanya ogu yaazaariiwemu, Ruhanga akamutoorana ahabw'omurimo gwe, aha kuzaarwa kwe. Kandi amagara ge gagaba gagumiire kimwe kugatuura. Ahabw'okuba, n'omuntu, kandi naayenda kugatuura omu muringo gumwe, kwonka Omwoyo wa Ruhanga amwebembera omu gundi muringo. Ka n'okusharamu kw'obushema, nikireebeka, oku yaakusharamu. Kunu, naayenda kwema aha ngoma, kuba omuhunguzi w'ensi; reero akatooranamu orubaju ruri, okuhinduka encuubwa, nari ekizengyerezi. Nikireebeka, omu kuteekateeka, kikaabaire ekintu ky'obushema.

Kwonka nitureeba eishomo rikuru hanu. Ngu, abantu abarikukuratira Omwoyo, n'abashema, aha nsi, ahabw'okuba n'ab'obundi Bukama, nibeebemberwa omu gundi muringo, nibeebemberwa Omwoyo. Ai Ruhanga ogwo k'abe nyowe, naimwe mwena, kugira ngu tukuratire obwebembezi bw'Omwoyo, oku biri kwona, amaisho tugahangire okuraganisa kwa Ruhanga, tukutegyereize ngu kuhikiirire.

10 Ekyo nikyo Musa yaakozire. Faraho akashoma Ebyahandiikirwe bimwe ebi Musa yaashomire. Kureka, Faraho Yaabireeba omu gundi muringo. Musa akareeba abantu nibo bamwe abu Faraho yaareebire. Faraho yaabareeba nk'abahuuku n'abakaatsi b'obudongo. Musa we akabareeba nk'abeetsirwe kandi abatoorainwe.

Okwo nikwo ndikwenda ngu ndeebe Ekanisa ya Ruhanga ohuriire, atari nk'ekibiina ky'abarikurengyesereza omu kwikiriza nari encuubwa, kureka nk'abu Ruhanga yaatooraine; kugira ngu mbaase kuhayo amagara gangye, nka Musa oku yaagahaireyo, ahabw'Ekanisa nkuru egi kandi n'ahabw'ogwo Murimo.

Hati, nitureeba Musa naayetwa. Kandi ahanyima y'okutumwa, yaaremwa omurimo gwe ogu yaatumirwe, ahabw'okugyezaho kugukora omu muringo ogu yaateekateekire ngu nigwo gwabaire guri murungi munonga.

N'ahabw'ekyo nikigaruka kitwegyesa ngu, titurikubaasa kutwara eki turikuteekateeka ngu nikyo kirungi munonga, nari eki omuntu arikuteekateeka ngu nikyo kirungi munonga. Nituteekwa kutoora omu muhanda ogu Ruhanga agambire ngu nigwo gurikukirayo kuba murungi. N'ahabw'ekyo, okukuratira Ekigambo kya Mukama obutoosha nikyo kirikukirayo oburungi. Toora omu muhanda ogu Ruhanga yaagambire.

11 Kandi omu kuremwa kwe, nitureeba ngu akahunga yaaruga omu maisho ga Faraho, yaaza omu ihamba, ei yaataahiize muhara wa Yesero, Zipora. Kandi okwo, ahanyima y'okumutaasya, akamuzaarira omwana w'omwojo, Gereshomu. Bwanyima yaatebeekana, yaacureera kandi yaagira obusingye, nk'orikushuubura entaama.

Kwonka, eizooba rimwe, Ruhanga akahurira okutaka kw'abantu Be. Ruhanga yaijuka ku Yaakozire endagaano n'abantu abo. T'ekyo kyonka, kureka nabwo Akaijuka ku Aine omuheereza ou Yaayetsire, akatoorana, kandi ku Yaakozire endagaano n'ogwo muheereza. Kandi Ruhanga tarihindura endagaano Ye nari okuhindura ebyetengo Bye, nari okuhindura ekintu kyona. Ruhanga obutoosha arinda okuraganisa Kwe. N'obu Musa Yaamuhemukiire kandi akakora ekyo ekitahikire, kwonka nabwo Ruhanga akarinda endagaano Ye. Ruhanga ku ayeta omuntu kugira eki yaakora, ogwo muntu naateekwa kukikora, buzima naateekwa kukikora.

12 Omuntu akambuuza, enshumi nkye egingwire ati, "Tusherure ebiconco byaitu hati ahabw'obuheereza bwaitu?" Ow'eishe-emwe Omumetsodisiti owaabaire aherize kuheebwa Omwoyo Orikwera.

Naagira nti, "Ngaaha. Ekyo otakikora. Ku oraakikore, obwo Ruhanga tarikubaasa kukukoresa." Naagira nti, "Ekintu kyonka eki oshemereire kukora, n'okugumizamu ori Omukristaayo. Ruhanga ku araabe akwetsire, Naija kukuta omu mwanya gwawe buzima."

Emirundi mingi, abo abasherura kandi bakagyezaho kutunga ebintu, Ruhanga ku yaakugira eki yaabaha, bakaabaasa, haihi, kwetunguura. Nangwa, emirundi mingi, omuntu ou Ruhanga ayeta, n'ogwo muntu orikugyezaho Kumuhunga; Musa na Paulo, n'abandi abatari bamwe, bakagyezaho kuhunga okwetwa omu buheereza.

13 Kwonka nitureeba hanu ngu, Ruhanga, n'obu Musa yaaremire omuri byona ebi yaakozire, nabwo omukono Gwe gukaba gukimuriho. Kandi Yaamweta kugyenda, kukora omurimo gwa Ruhanga, yaamweta kuza aha murimo gwe. Kandi ekyo ka nikiteekwa kuba kyahuumuriize Joshua, ku yaahuriire Ruhanga naagira ati, "Nk'oku naabaire ndi na Musa, nikwo ndiguma naiwe."

N'obu kiraabe, ku naakuba ningyezaho, haza nkaremwa, Ruhanga takantsigaho. Tiinyine bwesigye bwingi omu muntu weena oine obwoba bwingi akaremwa kugira eki yaakora. Haakiri nshangwe ndemirwe okukira kuba omweremwa munonga nkaremwa kugyezaho.

14 Rimwe kikagambwa ngu Kampuni ya Ballard na Ballard y'Esaano ekahandiika omukozi, kandi akaba naaza kuhandiika eiziina rye, kwonka ekaraamu y'ekiti y'ogwo mushaija ekaba etaineho kasanguzo aha muheru gwayo. Reero Omw. Ballard yaamubuuza ati, "Ahabw'enki otaine kasanguzo?"

Yaagarukamu ati, "Nyowe tinkora nshobe."

Ballard yaagira ati, "Kyaba kiri kityo tindikubaasa kukukozesa. Ahabw'okuba, ku oraakore enshobe, no . . . Ku oraabe otakora nshobe, tihaine eki oraakore." Ago n'amazima.

Ruhanga tarikukujunaana enshobe zaawe. Naakutura eki orikukora oyekundiire, ekibi eki orikukora nkana.

“Ogwo owaaherize kuheebwa okumanya Amazima, ku ashiisha nkana.” Kwonka omuntu orikuza kukora ekintu, naaza kukora enshobe y'amaani, naaza kugwa. Naaza kukora enshobe. Kwonka buzima ku araabe ayeetsirwe Ruhanga, na Ruhanga ari omu mutima gwe, naija kugaruka aimukye.

15 Emyaka mingi egingwire, hakaba hariho, omushaija mukye n'omukazi we, abaabaire baija aha kanisa aha, kandi nibabaasa kuba bari hanu akasheeshe aka. Bakaba beeshongora ekyeshongoro ekyabaire kinshemeza munonga. Nikyeshongorwa kitit:

Nsaasira, Mukama, kandi ongyeze ogundi murundi,
Ninza kuba Owaawe ku Oraabe owangye;
Ku ndaagwe nari ku ndaaremwe, ka nyimukye ngarukye ngeyezeho,
Nsaasira, Mukama, kandi ongyeze ogundi murundi.

Ekyo ninkikunda. Ahakuba, omuserukare murungi weena nikibaasa kubaho ahutaare nari ahikweho ekihikiirizi. Kwonka ku araabe akiri omuserukare, kandi aine ekigyendererwa, hamwe n'eki arikurwanira, naija kwimuka kandi agarukye agyezeho. Omuserukare murungi weena w'Omusharaba ekyo naakikora.

16 Kandi ahari Joshua, omuduumizi musya w'eithe, Musa ku yaaherize kufa, ku yaareebire oku Ruhanga yaagumire nawe omu nshobe ze, akaguma omutima yaagira obumanzi omu kutumwa kwe.

N'obu Musa yaakukozire ki, ekaba eri ofiisi ya Musa ei Ruhanga yaabaire naaha ekitiinisa. Akaba ari nabi. Akaba naakira baanabi boona. Buzima akaba naakirira kimwe nabi weena ou baabaire baine. Munyaanya we wenyini ku yaamushekyereire, ahabw'okutaasya omwishiki w'Omunyesiopia, Ruhanga Akabeeta hamwe Yaagira ati, “Timurikutiina Ruhanga?” Ati, “Omuriimwe ku haraabe harimu omuntu, ow'omwoyo nari nabi, omu kworekwa nimwo ndigambira nawe, kandi n'omu birooto nimwo Nyowe ndimwemanyisiza. Kwonka Musa we tikwo mutwaza; we ngamba nawe butunu nitureebana. Torikutiina Ruhanga?”

Mwareeba, ekyo ti kintu kirungi, okuribatiirira abantu ba Ruhanga. Nooshaasha Ruhanga ekyo waakikora. Ruhanga akaba atumire Musa; okuremwa kwe kukaba kutaine makuru. Ruhanga akaba naamanya omutima gwe.

17 Kandi rimwe we, Musa, akeetomboita ahabw'okugira bingi munonga by'okukora. N'ahabw'ekyo Ruhanga yaakwata Omwoyo We Yaamubaganisamu yaamuha abantu makumi mushanju. Tibaragizire Mwoyo orengire ahari ogwo ou baabaire baine okubanza. Kureka ekintu kyonka, bakagira abakozi baingi, Omwoyo ari ogwo omwe.

Ruhanga naabaasa kuta Omwoyo We weena aha Muntu omwe Yaaba naayenda, kandi Naabaasa Kumubaganisamu akamuha abantu enkumi n'enkumi Yaaba naayenda. Eizooba rimwe Akata Omwoyo We weena aha Muntu omwe orikwetwa Yesu. Hati Akamubaganisamu yaamuta omu makanisa Ge, hoona hoona. Ruhanga arinda ou atumire.

18 Hati Joshua, omurwani musya. Babiri bonka nibo baabaire batsigaire hati, ahari abo abaabaire barugire omu nsi eyaaraganisiibwe, kandi abo bakaba bari Joshua na Kalebu. Hati, Joshua, omuduumizi musya, kwebembera eithe, owa kabiri omu mwanya ogu omushaija emanzi nka Musa yaabaire arimu. Gukaba gutari murimo gwanguhi.

Nintekateeka aha muheereza, ebiro ebi, oyetsirwe Ruhanga, kuza omu bigyere bya Yesu. Ka n'okuragiirwa! Ka n'okutumwa! Kandi buri omwe oyetwa Ruhanga atumwa kwemerera omu mwanya ogwo gwonyini. “Ndyaguma naimwe, nangwa n'omuriimwe, okuhitsya aha muheru gw'orugyendo.” Buri muheereza naayetwa kwemerera ahu Yaayemereire. “Emirimo ei Nkora naimwe muryagikora.” Buri muheereza oteirweho Ruhanga, naaragiirwa kwemerera omu bigyere bya Yesu Kristo kandi akore emirimo ei Yesu yaakozire. Buzima okwo n'okuragiirwa.

19 Kandi ka nikiteekwa kuba kyahuriirwe, obu Joshua yaabaire ayemereire aho akasheeshe ako, naagamba na Ruhanga. Yaagira ati, “Tindikuhemukira. Nk'oku naabaire Ndi na Musa, nikwo Ndigunga naiwe. Tihaine muntu weena oribaasa kukuza omu kas, ebiro byona eby'amagara gaawe. Ndyacwekyereza kandi marireho kimwe. Ndyashemeza omuhanda. Kureka, ba ow'amaani ogumire kimwe omutima. Otahahaaza omutima, ekyo nikimanyisa, okweraarikirira. Otagira obwoba. Ndi naiwe. Ndyakusinguza.” Ka n'omurimo ogwahairwe ogu mushaija musya orikwetwa Joshua!

Hati, hanu hariho ebirkushushaniriza bingi munonga ebi turikubaasa kutaahamu, kwonka bimwe nituza kubireka. Eky'okureeberaho, nka Musa, akaba ari obusingye bw'ekanisa obwabareetsire bukahabitsya ahari Sinai, aha nyegyesa yaabo y'ebi'ediini; eby'ekiro ekihweire. Musa taraikiriziibwe kwambusya Abaisraeli eseeri omu nsi eyaaraganisiibwe, ahabw'okuba akaremwa.

20 Kandi ekanisa y'ekibiina ky'ediini, y'ekigombe ky'ediini eremirwe. Tibaryambusya Ekanisa eseeri. Ruhanga naija kutaho enkora nsya, enkora y'okutakwatanisa n'ebigombe by'amadiini byona, ahabw'Amaani ga Ruhanga, agaraije kutwara Ekanisa gakagihitsya omu Nsi eyaaraganisiibwe. Ebibiina by'amadiini hamwe n'ebigombe by'amadiini Bigizambagwize, buri omwe akuratiire enyegyesa yaabo y'ebi'ediini, buri omwe akuratiire oku barikuteekateeka. Kwonka Ruhanga naija kukwata Omwoyo We Orikwera ateho ba Joshua Be abaraije kutwara Ekanisa bakagihitsya aha kuraganisibwa, hatariho migoye y'ekigombe ky'ediini egikomire ahantu hoona, kureka

nibaija kwambusya Ekanisa Ye.

Musa akaremwa; akaba ari omuhi w'ebiragiro. Embabazi zikeeta Yoshua, atyo yaatwara ekanisa omu maisho.

21 Nitureeba nabwo ngu Yoshua, ahabw'okumanya okutumwa oku, ahabw'okumanya ngu niwe owaabaire atumirwe, ngu Ruhanga akaba amweteire omurimo ogu arikuteekwa kutaremwa, akeecureeza omu maisho ga Ruhanga. Kandi ku yaayetsire abantu bakeeteeranira hamwe kandi akabagambira ku Ruhanga yaabaire amutumire, kyo reeba okushaba kw'abantu abo. Bakagira bati, "Nitwija kukukuratira nk'oku twakuratiire Musa, ku turaareebe ekyabaire nikikukuratira Musa, nikikukuratira. Ba ow'amaani ogume omutima."

Ekyo nikyo kishemereire kuba ekirikwetengwa aha muntu weena ozairwe obwa kabiri eriizooba. Ku turaabe nitushabwa kukuratira, mbwenu ka tureebe obumanyiso nibukuratira omwikiriza. Nk'oku Yesu yaagizire ati, "Ebintu ebi Nkora naimwe muryabikora."

Okubanza, naabashaba, buzima kwigura emitima yaanyu y'omwoyo akasheeshe aka, 'habw'okuba niinyesiga ngu nimuza kwetegyereza eki ndikugamba. Turi hamwe n'abantu b'ebigombe by'amadiini, ebibiina by'emiringo yoona biteeraniire hanu akasheeshe aka, okutandikira aha Bakatoriki n'Abapurotesitante, n'abantu baingi b'emiringo etari emwe, n'ahabw'ekyo nikiza kushuuuurirwa abajwire Omwoyo, hatariho kubanganisa.

22 Hati Yoshua akaba naateekwa kworobera okuragiirwa oku. Abantu bakagira bati, "Ka Ruhanga agume naiwe nk'oku Yaabaire ari na Musa, reero nitwija kumanya ngu Omwoyo ogwo omwe owaatwebembeire akatuhiitsya hare hati naabaasa kugumizamu naatwebembera."

Oo, Ekanisa k'eshemereire kureeba, akasheeshe aka, kusherura Omwoyo orikukorera omu bantu, ku oraabe nooyenda ekanisa y'okushabiramu ahu Omwoyo ogwo owaazoire Kristo omu bafu, Omwoyo Orikwera, araije kukorera omu bantu. Ogwo n'Omwoyo wa Ruhanga orikwimuka, omu biro by'aha muheru, kwambusya abantu, kubahitsya omu Nsi eriya, kubataasya omu kuraganisibwa kwona kw'emigisha yoona ya Ruhanga, n'omu murimo gwona ogu Yaahaire, nimmanyisa okuraganisibwa. "Okuraganisibwa oku n'okwanyu, n'okw'abaana baanyu." Nk'oku Israeli yaasherwire egoo nsi eyaaraganisiibwe, barikumanya ngu haine ahu eri, ahabw'okuba haine owaarugireyo, enyimaho, nikwo kiri n'aha Kanisa. Nitumanya ngu haine ahu egoo Nsi eri. Hariho ahu Amaani gari, ahabw'okuba hariho abandi abaarugireyo. Nitumanya ngu egoo Nsi eri seeri y'omugyera, ei turikuza, akasheeshe aka, nitugyezaho kuza omuri egoo Nsi eyaaraganisiibwe.

Yoshua akaba naamanya ngu egoo nsi eriyo. Akabanza yaagyenda yaatata, kugira ngu abaase kugaruka nka kareebi.

Abaheereza abeetsirwe Ruhanga tibashemereire kwijura enyegyesa z'ebi'ediini, kureka babe baataayaayiire Ensi ei turikuzamu, baiheyo ebirikworeka rukundo ya Ruhanga n'Amaani ga Yesu Kristo, kumanyisa abashomi baabo, ku hariho Ensi seeri y'omugyera.

23 Hati, ekiro ekihweire, mbuuriire ahari, "okuza Yorudani." Hati, ku turikuhika ahari ogwo mugyera, nigungutubaganisa. Waayambuka aha rubaju ruri, nihaba hariho ekyakubaho.

Hati, Yoshua, omuri ebi byona, ahabw'okumanya ngu okutumwa kwe kukaba kuri kukuru; kwonka, aine obuhame, akaba naabaasa kuba emanzi. Akaba naabaasa kuba nk'oku twakukyeta, ekihanda, kasita aba yaabaire aba ari omu muhanda oguhikire. Akaba naabaasa kutomera orushozi rumuteera rumugarura enyima, kwonka akaba ari omu muhanda oguhikire.

Nikwo n'Ekanisa ya Ruhanga ohuriire erikubaasa kuba ekihanda kandi emanzi, omu kwikiriza, ku turaabe turi omu muhanda oguhikire. Ahakuba, Akagira ati, "Nk'oku naabaire Ndi na Musa, nikwo Ndigunga naiwe." Tindikuhemukaho kandi tindikutsigaho. Taratsigireho Musa na kakye. Tarahemukiire Musa. Tarihemukira Yoshua. Tarituhemukira. Aryaguma naitwe.

24 Kandi ku turikureeba Yoshua naikiriza okutumwa oku, naamanya obujunaanizibwa obwo ku bwabaire buri okubeebembera akabarabya omu nsi, hati, ngu akaba naateekwa kwambuka kuza omu nsi endijo. Akaba naaza kutandikaho obukama bwabo. Akaba naaza kubagabira obuhunguzi. Akamanya ngu omurimo gukaba guri ogw'amaani munonga, okukirira kimwe ogu Musa yaakozire. Yoshua akaba aine bingi by'okukora okukira ebya Musa.

Ekindi kintu, akaba ari ow'okubeebembera kubahitsya aha nyatano, omuri beene waabo. Bakaba baarorize aha shagama. Akaba naateekwa kubasingura. Akaba naateekwa kubacureeza obwo bariyo nibagyenda omu maisho.

Nikwo kiri n'eriizooba n'eki kibiina kisia ky'Abapentekoote ekirikurugayo ebi, barorize aha nkora y'ebigombe by'amadiini. Kigumiire kimwe kubagumyayo.

25 Emyaka mingi ehangwire, bakagira bati, "Ija, Ow'eishe-emwe Branham," okubanza obuheereza obu obu butandika, "tutandikye ekibiina ky'ediini, tugire ahu twakwombekyera ekiijutsyo. Tindikusherura ekiijutsyo. Ntegyereize Okwija kwa Mukama.

Bakatandikaho akadiini k'ekikwangara, akarikwetwa "enjura ya katumba," kaaza eruguru omuri Canada, kandi kaagumizamu kaahika omuri California, kwonka kagarukira aho. Hataraho kubanganisa, tikarikubaasa kurenga aho. Ahabw'enki kyabaireho? Ekintu kyonka eki barikumanya; bakaruga omuri ebyo bintu, n'ahabw'ekyo bakikwatsireho kakye. Nibateekwa kugira eki baakora.

Ow'eishe-emwe, Ekanisa y'amazima ya Ruhanga ohuriire ti y'emikoro, teine nyikiriza y'ediini. Neeyebemberwa Amaani ga Ruhanga agari omu mutima gwa buri muntu. Raba ahari beenesho. Otabateeza empaka. Nitubakira. Otabateeza empaka. Raba aha rubaju.

26 Niinyenda ngu mureebe ekintu kikuru ekyabaire hanu. Hakaba hariho Esau, Moabu, kandi n'abo abu tugambireho, ekiro ekihweire. Baingi ahari abo bantu, baingi ahari abo buzima bakaba bari abaikiriza b'aha nyatano. Bakaba bari aha nyatano honyini.

Oo, nintekwa kugira eki naayemereraho hanu akaanya kakye, nikintwarira akaanya kakye. Abantu baingi bagira ngu ensi eyaaraganisiibwe n'Okutegyeka kwa Kristo kw'emyaka rukumi. Tikwo. Ensi eyaaraganisiibwe ekaba erimu engamba n'okwita. Okutegyeka kwa Kristo kw'emyaka rukumi tikurigira ngamba nari okwita kwona. Ekaba neeshushanisa Omwoyo Orikwera, ah'okurwanira.

Okwiwhaho orubanja; bakaruga Misri. Ebicweka bishatu by'orugyendo rwabo. Bakaruga Misri, omu kwihwaho orubanja, nibaikiriza Ekigambo. Baayetaanisa n'Abanyamisri kandi baarugayo. Baayambuka Enyanja Erikutukura kandi baita ebintu eby'enyima, okwabaire kuri okwezibwa kurabira omu Shagama, okurikwita okwetenga kw'obuntu kwona kw'okukora ebibi; ekicweka kya kabiri ky'orugyendo. Kwonka ekicweka kya kashatu n'obu bambuka Yorudani, bakataaha omu nsi eyaaraganisiibwe ahu obuhunguzi bwabo bwabaire buri. Obuhunguzi bwabo bukaba butari omuri Misri na kakye, n'obu kiraabe kiri ngu Ruhanga akaba abahaire omugisha omuri Misri.

27 Iwe Owaaluteeri orikwikiririza omu kwihwaho orubanja; obuhunguzi bwawe tiyo buri, ku oraabe waayetsirwe. Ku oraabe ori Owaaluteeri kwonka, aho torirengaho.

Imwe Abametsodisiti, n'Abanazarayo, n'aba Pilgrim Holiness, hamwe n'aba Church of God, abarikwikiririza omu kwezibwa, okwita obubi oburi omuriimwe, okwihamu emizi y'obubi, owaanyu ni seeri y'omugyera.

Kwonka imwe abashaija n'abakazi abaine ekintu omunda yaanyu, ekirikweta, okuzimu kwaba nikweta Okuzimu, hakiriyo Yorudani y'okwambuka, kandi n'Ensi seeri y'omugyera.

Akagira ati, "Mwaza kuraba omuri beene waanyu. Mwaza kuraba omuri beene waanyu, kandi

bari haihi n'enyatano. Kandi ku muraabarabemu, hatagira eki mwabagambaho. Orushozi oru Nduhaire Esau. Egi nsi Ngihaire Moabu. N'ahabw'ekyo Tindikwenda ngu mubateeze empaka, kugyezaho kubahindura. Murabemu kwonka, mpore mpore. Nimumanya ei murikuza. Mutatooreza emize yaabo."

28 Moabu ekaba eine nabi w'ebishuba, bishopu orikwetwa Balamu, owaashuumire akahika omu mutwe gw'abantu, akagyezaho kubahitsya aha kukora ekibiina, kandi boona bakateeranira hamwe, 'habw'okuba bakaba bari eishe-emwe. Kwonka bakaba bataribo. Bakaba bari beene nyina, batari eishe-emwe buzima. Ku oraabe mu mutima gwawe . . .

"Otamuhakanisa. Ogumizemu, omurekye. Eki oraatungye okishashurire, ku kiraabe nikikwetaagisa kuraba omu nsi ye." Akatooranwa ira atakabaireho kukora ekyo. Kuri Ruhanga yaateekateekire nari yaatooraine ira Moabu kwegaita hamwe na Israeli, bakaabaire beegaitsire hamwe. Kuri Yaatooraine Esau ira kugyenda hamwe na Israeli, Esau akaabaire yaagurukiiremu agyenda. Kwonka Akamuha obuhunguzi bwe aha rubaju ruri rw'omugyera.

29 Mbwenu noobaasa ota kugyezaho kutuma Abaaluteeri boona Baakireeba, Ababaputisiti boona Baakireeba, Abapuresibateeri boona, n'Abanazarayo, hamwe n'aba Pilgrim Holiness? Otabacwera orubanja. Nikyo ekyo kyonka eki barikumanya. Nikyo ekyo kyonka ekiri omuribo.

Kwonka ahariimwe abarikwikiriza, (Ai Ruhanga), ahariimwe abarikumanya, ahariimwe abaine ekintu omuriimwe, ekirikweta Okuzimu. Okuzimu ei oine yoona ku eraabe emazirwe, obwo ogume ah'ori. Kwonka nyowe n'eka yangye, ahariinye hariho ekirengire aha ki yaareebire. Hariyo ensi seeri y'omugyera, okwo. Hakiriyo okuzimu erikweta Okuzimu. Tindikubaasa kumarwa n'enyegeyesa z'ediini. Tindikubaasa kumarwa n'ekanisa nungi. Tindikubaasa kumarwa n'ehururu nungi. Tindikubaasa kumarwa na saaviisi nkye y'okutamba endwara. Hariho ekirengire ahari ekyo, ekirikweta.

30 N'ahabw'ekyo, obarekye. Ogumizemu ohingure. Otabateeza empaka. Kwonka niturabamu nituza omu ndijio Nsi. Tibaratoorainwe kugyenda naiwe. Tibakaagyenda naiwe. Abantu babiri nibabaasa bata kugyenda hamwe bataikirizaine? Kureka ahari abo abarikukunda Ruhanga, ahari abo abaayetsirwe Ruhanga. Mpaho, nibagira bat, "Ruhanga akatuha egi kanisa. Ruhanga akakora eki."

Ekyo kihikire. Ruhanga akagira ati, "Orushozi oru nkaruha Esau. Otamukoraho. Kwonka iwe Nkwiniire eky'omutaano. Yambuka." Amiina.

Ekyo nikyo kyetengo kyangye, b'eishe-emwe, okureeba ekanisa yangye neeyambuka neeza omu ndijo Nsi, ekyetengo ky'okwambuka kuza aha rubaju ruri. Ku haraabe hariho ekiri omuriwi, hanu, okubanza, nokyeta, nihaza kubaho Ekintu ky'okugarukamu okweta okwo. Okutebeekana okariisa entaama kusha, tikirikukumara. Okuba nk'omu bushubuzi, tikirikukumara. Okuba memba w'ekanisa reero okahandiikisa eiziina ryawe omu kitabo, tikirikukumara. Ahabw'okuba, hariho ekintu ekyetsire, aha mugongo hoona eseeri okwo, okwambuka ogundi mugongo, na hoonahoona eseeri ya Yorudani, okuhitsya obu orikugwa omu mikono ya Ruhanga, seeri, okuzimu erikweta Okuzimu.

31 Yoshua akamanya ngu omurimo ogu gukaba guri mukuru munonga. Mwetegyereize aho? "Na . . ." Yoshua ku yaatandikire kwambuka Yorudani, Yoshua ka yajukire omurimo gwe! "Ekitabo eki eky'ebiragiro, Ekigambo Kyangye, kitarikuruga omu kanwa." Omu bindi bigambo, "Yoshua, Tindikufayo eki oruganda ruraagambe, eki ondijo munyadiini araagambe. Guma n'eki Kigambo, ahakuba obwo nibwo oribaasikirwa ei oriza yoona. N'obu baakukora ebintu bihango ebirikwingana ki, bakakora n'ebintu bikye ebirikwingana ki, bakakora n'ebibiina by'amadiini ebirikwingana ki, guma n'Ekigambo, Yoshua." Oo, mugyensi! "Guma n'Ekigambo, Ekigambo eki. Ekigambo eki kitarikuruga omu kanwa." Ka ngarukye Nkishome.

Kwonka ba ow'amaani, ogumire kimwe omutima, kandi oyerinde ohitsye ebiragiro byona ebi Musa omugaragwa wangye yaakuragiire; otaribiteishukaho kutoora aha rubaju rwa buryo nari orwa bumosho, . . .

32 Ekigambo ku kiraagire kiti, "Kora ekintu nanka," Kikore. Tindikufayo eki ekibiina ky'ediini kiraagambe. Kikore, n'obu kiraabe. Ogwo niwe Yoshua ou Ruhanga ategyereize. Otakeishukaho na inci emwe, akacweka na kamwe. Gumira kimwe n'Ekigambo.

. . . otaribiteishukaho kutoora aha rubaju rwa buryo . . . nari orwa bumosho, obone kubaasikirwa . . .

Oo, nimuteekateeka ngu nimubaasikirwa mwaba nimwombeka amakanisa mahango, mwaba nimwongyerwaho abantu omutwaro gumwe omu kigombe kyanyu ky'ediini. Okwo tikubaasikirwa. Ekyo tikirikubairiza haihi n'okuraganisibwa na kakye. Ekiturikwetenga n'okwongyerwaho Ruhanga, okwongyerwaho Omwoyo Orikwera.

. . . obone kubaasikirwa, ei oriza yoona.

Ekitabo eki eky'ebiragiro kitarikuruga omu kanwa; kureka ogume nookiteekateekaho nyomushana na nyekiro, . . .

Waaba nooteekateeka aha kugira eki waakora, nooyegamira Ekigambo kya Ruhanga omu kukikora? Nooreeba ekyetengo kyawé kiri omu Kigambo? Noobuurira ebiri omuri Baiburi? Ori nka baangi ebiro ebi, kandi baangi munonga, "Abarikubuirira Enyegyesa y'ebiragiro by'abantu"?

33 Ekitabo eki eky'ebiragiro kitarikuruga omu mukono nimmanyisa omu kanwa; . . .

"Akanwa kaawe," ebi orikugamba. Otakishoma kwonka haza okarabaho okagyenda. Kigambe. Kituure. Kyegyese.

. . . kureka ogume nookiteekateekaho nyomushana na nyekiro, obone kwerinda, ohitsye byona ebihandiikirwemu; . . .

Nooreeba Yoshua ebiro ebi eki arikuza kuba? Nooreeba Yoshua w'Ekanisa y'omwoyo eki arikuza kuba? Naashushana nka Yoshua ou baabaire baine omu kanisa y'omubiri. Ekanisa y'omwoyo neeteekwa kuba ekintu nikyo kimwe.

Baiburi ku eraabe yaagizire eti, "Omuntu ku aba atazairwe bwa kabiri, tabaasa kureeba Bukama bwa Ruhanga," Yoshua w'omwoyo naagira ati amiina.

Baiburi ku eraabe neegira eti, "Yesu Kristo tahinduka oku abaire ari nyomwabazyo nikwo ariguma ebiro byona," Yoshua w'omwoyo naagamba ekintu nikyo kimwe. Tahinduka.

Baiburi ku eraagire eti, Ekitabo, Ekigambo nikigira, ku kiraagire kiti, "Mugume omu rurembo rwa Yerusaalemu okuhitsya obu murijwekwa Amaani agarikuruga omu Iguru. Omwoyo Orikwera ku ariheza kubaijaho, muryaba baakareebi Bangye," Yoshua w'omwoyo naagamba ekintu nikyo kimwe.

34 Nk'oku Petero, aha Izooba rya Pentekoote, yaagizire ati, "Mweteise, mwena mubatizibwe omu Iziina rya Yesu Kristo, mubone kusaasirwa ebibi byanyu, kandi nimwija kuheebwa ekiconco ky'Omwoyo Orikwera," Yoshua w'omwoyo tariteishukaho akacweka na kamwe, kureka aryakora ekyo kyonyini eki Ekigambo kirikugamba.

Mako 16 ku haraabe nihagira hati, "Mugyende omu nsi zonna, mubuuri Engiri. Oriikiriza akabatizibwa aryajunwa; otariikiriza aryasingwa orubanja. Obumanyiso oburiguma nibukuratira abarikwiriza n'obu: omu Iziina Ryangye baryabinga baadaimoni; baryagamba endimi nsya; baryakwata enjoka; kandi ku barinywa ekirikwita kyona, tikiribarwaza; baryata engaro aha barwaire, bakire," Yoshua ow'omwoyo aryagamba ekintu nikyo kimwe. Aryakiteekateekaho nyomushana na nyekiro, abone kubaasikirwa ei ariza yoona.

35 Niinyenda ngu mureebe ekyabaireho. Yoshua, ku yaahikire aha hururu ye y'okubanza, omurundi gwe gw'okubanza kuhanya ku yaabaire ari Yoshua buzima. Abaisraeli bakaba bashemereire kumanya ekyo.

Tihariho kubanganisa, abanyadiini bakaba baine ekindi kiteekateeko. Bakagira bat, "Hati, nituza kuteera amahema hanu okuhitsya omu bwire bw'emit kutooka, nimmanyisa okuhitsya omu bwire bw'ekyanda, Yorudani neija kukyendeera."

Kandi nooshusha oti Ruhanga akanaga omu maisho ga Yoshua ow'omwoyo bimwe aha bintu ebirikukirayo kuba eby'obushema.

Akamuhitsyayo omu kwezi Kwakana, obu Yorudani yaabaire eyeyongyeire emirundi eshatu nari ena omu kwijura kwayo. Akaba naamugyeza, kureeba ku araabe ari Yoshua ogwo buzima.

Ka buri kintu kigylene kubi. Ka buri omwe weena atunguukye. K'abandi babaasikirwe. K'abantu "abaine enshusha y'okutiina Ruhanga, bakahakanisa Amaani Ge," babaasikirwe, kandi bakutsindikye enyima. Kwonka ku oraabe noomanya ahu oyemereire, noi ja kwemerera. N'obu haakubaho ki, ensi yoona n'obu yaakukwanga, nooguma oyemereire nka butoosha. Toraateishukye okaruga ahari ekyo Kigambo.

36 Yorudani ekaba eyeyongyeire emirundi eshatu nari ena omu kwijura kwayo; neetiinisa, neitsa obwoba bwingi kugireeba, eri ebyondo. Kwonka Yoshua akagira ati, "Ruhanga agizire ati, 'omu biro bishatu,' nituza kwambuka. N'ahabw'ekyo nituza kwambuka."

Hati abanyadiini bakaagizire bat, "Hati rindaho kakye, Yoshua. Turi abantu abeegire. Turabukire. Abaingi omuriitwe hanu turi ba inginiya kuruga Misri. Nitumanya kukora ebintu ebi, n'ahabw'ekyo nituza kutegyerezaho akaanya kakye okuhitsya obu omugyera ogu guraijurukye, reero tubone kugwambuka n'ebigyere. Ekyo tikirikukiraho kwanguha munonga?"

"Tindikufayo eki murikuteekateeka. Ruhanga yaagizire ngu omu 'biro bishatu' nituza kwambuka. Kandi nituza kwambuka. Nituza kwambuka, omu biro bishatu."

Reeba eki Yoshua yaakozire. N'enki eki yaabandize kwebembeza, abanyadiini? Ngaaha, sebo.

Akeebembeza Ekigambo. Yaagira ati, "Muheekye eshanduukye y'endagaano, reero abanyamurwa mwena muze hare Yaayo. Mugize enyima. Mutagyezaho kugybembera. Murekye Ebeebebere."

37 Ogwo nigwo murabanamu ebi. Nitugyezaho kwebembeza Ekigambo, kandi tuhingura, reero tuygema Ekigambo kuba eki, Ekigambo kuba kiri. Emitima yaanyu eheebwe omugisha. Eki turikwetenga ebi, ni, okukuratira Ekigambo.

Ekigambo kikebembera omu muhanda. Ku kyahikire ahari Yorudani, Yorudani yaayebaganisamu batyo baayambuka. Ehururu ye y'okubanza, akata ebintu by'okubanza omu mwanya gw'okubanza. Ekyo akaba akiiniire enshonga. Akaba aine enshonga, ahabw'okuba Ruhanga akaba amuragiire ati, "Guma n'Ekigambo. Orekye Ekigambo kikikore." Buri hururu, bakasingura omu rugamba, ahabw'okuba Ruhanga akaba amuragiire okubanza yaayebembeza eshanduukye y'endagaano.

Eshanduukye y'endagaano ku yaabaire eheza kuza omu maisho, obwo ekyabaire kikuratiraho niki? Okweshongora, n'abateezi b'enanga, okurwana kutakabaireho. Haleluya!

Ekyo nikyo turikwetenga ebi, eki twine akasheeshe aka: abeeshongozi, enanga, okweshongora ebyeshongoro, okushemererwa. Kandi obanze oyebeebembeza Ekigambo, oshome Ekigambo. Reero orugamba rutandikye. Buzima nituza kusingura, nituteekwa kusingura. Gumira kimwe Nakyo, guma omu muhanda Gwakyo, Nakyo kiryakurinda omu bwire bw'akabi.

38 Akaba aine ekigyendererwa kirungi, hati, ijuka, obu ayambuka. Atakambukire seeri, akatumayo entatsi, ibiri, kutata ensi. Hati, Musa we akatumayo abantu baingi, kwonka boona bakagaruka baburabuziibwe. Kyo reeba obuheereza busya obu. Ekyo tarakikozire na kakye. Akamanya ngu, waaba oine ebiteekateeko rukumi na magana ataano ebitarikushushana, nooba oine okubuzabuzibwa rukumi na magana ataano. Kureka akatuma babiri, yaagira ati, "Muzeyo. Mutate ensi."

Hati nitwenda kuhika aha kintu eki ntarikwenda ngu mufeerwe. Akagira ati, "Hati, ku muraayambukye seeri . ." Bakarabaho, baaza kutata ensi, kureeba yaaba okuraganisibwa kwabaire kuri amazima, okureeba yaaba yaabaire eri nsi ya muringo ki, kandi n'oku baakubaasa kugitaahamu. Baayambuka seeri. Amaziina g'ezi ntatsi tigahairwe. Kwonka ku baagiire omuri egoy nsi, baahika omuri Yeriko, yonyini. Kandi ku baahikire Yeriko, ekyabaireho niki? Bakabugana maraaya, omukazi w'emicwe mibi.

39 Niinyenda kuteera ekishushani. Obundi shana tikihikire, kwonka niinyenda kukyorekyeraho ekintu kikuru. Titwine ebyafaayo bya Rahabu. Nitumanya ngu akaba ari maraaya. Ka tuteekateekye ngu akakurira omu ka ei baabaire bari abooro munonga, n'ahabw'ekyo yaagira emicwe mibi. Kandi akaba ari omukazi muto, murungi. Akaza omu nguuto z'omu rurembo, kusherura eky'okubaisaho nyina na ishe abaabaire bari ebimuga; akaba ataine buryo bwona bw'okubona omurimo, kureka okutunda omubiri gwe. Kwonka nintekateeka, obwire bwona, akaba

naamanya ngu kigwire. Hakaba haine ekiri omuriwe, ekyabaire kimugambira kiti, "Ekyo tikihikire kukikora." Akaba naamanya ngu tikihikire.

Reero eizooba rimwe yaahurira ngu hakaba hariho Ruhanga owaabaire naakora. Omutima gwe gwatandika kutetema. Yaabona entumwa erikuruga omuri ogwo mugyendo gw'amaani, eyaamugambiire ekyabaire nokyenda kubaho. Rahabu akagamba ki? Hati, Joshua akaba aine akamanyiso. Joshua akaba aine obumanyiso nk'obu Musa yaabaire aine, bwonyini. N'ahabw'ekyo ku ori . . . Rahabu tarashabire kureeba akamanyiso ka Joshua. Akahurira kwonka.

Eky'okureeberaho ky'Ekanisa, eky'okureeberaho ky'Ekanisa y'amazima etweirwe omu bwa maraaya. "Ndi Omumetsodisiti erizooba, Omubaputisiti nyencakare, Omupuresibateeri eizooba eryakurataho," kutwarwa omu bwa maraaya.

40 Kwonka, ahonaaho, omubuurizi mukye yaataaha omu rurembo yaagira ati, "Hariho Ruhanga ohuriire, obaire ari ohuriire nyomwabazyo, n'eriizooba nikwo ari. Amaani Ge n'eriizooba tigahinduka. Naakikora egoy mirimo ei Yaakozire obu Yaabaire ari hanu omu nsi." Abajwekyerwa be bari omu muhanda.

Hati, Rahabu maraaya, orikumanywa nka maraaya, akaba naashushanisa omwikiriza ebiro ebi, omwikiriza kashushu. Taragizire ati, "Hati nimpurira ngu, Joshua ogwo naabaasa kukora obumanyiso, ahabw'okuba niwe ahunguriire Musa. Nkaayenzire kureeba obwo bumanyiso. Kandi ku ndaareebe obwo bumanyiso, obwo ninza kukiikiriza." Mbwenu, buzima kikaba kitarikwetaagisa Joshua kworeka obwo bumanyiso, ahabw'okuba Rahabu akakiikiriza, oku biri kwona. Akaba atari Tomasi. Akakiikiriza.

41 Hati, Musa, ku yaatungire akamanyiso, akashuuma yaakora obwo bumanyiso, kwonka akamanyiso tikyo kintu ekyabahikize omu nsi eyaaraganisiibwe. Tikyo. Obumanyiso bukaba buri obw'okuhamya okutumwa kwe.

Kandi Rahabu akakiikiriza, atareebire ekintu kyona. Akagira ati, "Twena nitutetema."

Tiky'okutangaaza, Nikodemus akagira ati, "Rabi, nitumanya ku Ori Omwegyesa owaarugire ahari Ruhanga, tihariho muntu orikubaasa kukora ebintu ebi kureka Ruhanga yaaguma nawe. Twena nitukimanya."

Ensi neekimanya, ebiro ebi. Billy Grahamu naayeta n'eiraka rihango ati, "Nituteekwa kugaruka ahari Pentekoote." Orukiiko rw'Amakanisa nirweta n'eiraka rihango ruti, "Nituteekwa kugaruka ahari nabi, aha barikugamba omu ndimi, aha bashoboorozi b'endimi, aha butambi bwa Ruhanga, abatambi omu makanisa gaitu, kureka Omwoyo wa Ruhanga akakora nk'oku Arikwenda." Ruhanga Naayeta. Abantu nibatiina okuba nka Ruhanga okw'amazima, reero bagira batu, "Buri kintu, emitima etuhweire omunda."

42 Hati, kikaba kitarikwetaagisa Rahabu kureeba akamanyiso aku Joshua yaakubaasize kukora n'omukono gwe nari n'enkonni. Akaikiriza. Yaagira ati, "Naahurira, kandi niinyikiriza. Mbwenu hati ninshaba kugirirwa embabazi." Oo, ka nitubaasa kureeta eishomo hanu honyini. "Ninshaba kugirirwa embabazi, nyowe hamwe n'eka yangye."

Reeba ogwo Murooma ekiro ekyo, owaasyoireyo rurara ye, akaba naaza kwerezza, Omufilipi omurinzi w'embohe. Paulo akagira ati, "Oteekora kubi. Twena turi aha."

Yaabuuza ati, "Nshemereire kukora ki nkajunwa?"

Paulo yaagarukamu ati, "Ikiriza Mukama Yesu Kristo, noi ja kujunwa, iwe n'eka yaawe."

Ahabw'enki? "Iwe n'eka yaawe." Buzima. Iwe n'eka yaawe nimwija kujunwa. Ahabw'enki? Ku oraabe oine okwikiriza okurikugasha kutuma waajunwa, noobaasa kugira okwikiriza okurikugasha kutuma eka yaawe yaajunwa. Eego. "Iwe n'eka yaawe."

43 Reeba Rahabu. Rahabu akagira ati, "Mungirire embabazi. Mutaanyita. Tindikwenda kufa n'abantu aba abatarikwiriza. Tindikwenda kufa nk'enyamaishwa. Niinyenda kufeera omu mikono ya Yehova. Niinyikiriza Ruhanga waanyu, ahabw'okuba Ni Ruhanga w'Eiguru n'ensi. Akora ebintu ebirkureebeka. Atuma ebintu byaba byo. Tinkamureebaga naabikora, kwonka nabwo nimbiikiriza, n'obu kiraabe." Mwareeba? Akaba atakareebaga Joshua. Akahurira ebya Joshua kwonka. Akaba atakareebaga Ruhanga. Akaba atakareebaga omurimo gwa Ruhanga gwona. Akahurira kwonka. Abandi bakaba baagireebire, kwonka we akaikiriza ahabw'okugihirira. Hati yaagira ati, "Niinyenda ku nyowe, tata, na maawe tugirirwa embabazi. Bombi bakuzire munonga kandi n'ebimuga. Nyine na banyaanyazi. Niinyenda kugira okwikiriza ahabw'abo."

Kandi egoy ntatsi, ogwo mubuurizi, yaagira ati, "Eego, arikwija kunu, kandi nituza kukubuura egi nsi. Hati ku oraabe nooyenda ngu bajunwe, obataasye omu nju." Haleluya! "Ku oraabe nookiikiriza, irooko obareete obataasyemu hanu, ahakuba titurijunaanwa ku bariba bari omu nguuto z'omu rurembo. Kwonka ku oribataasya omu nju, turyajunaanwa," haleluya, ahu ako kagoye akarikutukura kaabaire nikaza kureereeta aha dirisa. "Nitwija kujunaanwa ku oribataasya omu nju."

44 Oo, b'eishe-emwe, ku haraabe harabaireho obwire obu tushemereire kureeta abakundwa baitu omu Nju, n'eriizooba, omu Nju y'Okwikiriza. Bareetemu, ahakuba obwire nibwija obu harikwija kubaho okutengyetsibwa. Kandi, baatata na baamaawe, na beenetata na banyaanyazi, bari buhooro baba bari omu Nju honka, 'habw'okuba

Amaani ga Ruhanga nigaza kugaruka gatengyetse ensi. Nikwo kiri. Kandi ab'omu Nju y'Okwikiriza bonka nibo barijunwa.

Hati, akagira ati, "Tindijunaanwa ku oriba otabataahize omu nju." Kandi Rahabu yaabarahiza ku bataraije kumucwekyereza nari eka ye. Onu yaagira ati, "Ku oribareeta omu nju, baryaba buhooro." Rahabu yaabashuumya yaabaiha omuri ogwo mwanya, batyo baagyenda.

45 Ogu maraaya mukuru, Rahabu, akaba omwikiriza. Nkashoma ebyafaayo bye, hanu enshumi nkye egingwire. Ku baaherize kumushwija n'okumutaasya omu kwikiriza, ahabw'okwikiririza omuri Ruhanga kwe, baamutaasya omu kwikiriza kw'Abaisraeli, yaahinduka yaaruga omu kwikiriza kwe. Yaanywana genero omu ihe, ow'eие ry'Abaisraeli. Kyo reeba eki Ruhanga yaakoreire ogwo mukazi. Kandi baka . . . Bakaza omuri Betelehemu, baazaara omwojo; kandi ogu mwojo, baamweta Boazi. Kuruga omuri . . . Boazi, akataasya Ruusi, Ruusi na Boazi baazaara Yeese; Yeese yaazaara Daudi; Yesu yajia kurabira omuri Daudi. Haleluya!

Ahabw'enki? "Okwikiriza kuruga omu bituhurira, kuhurira Ruhanga ori Ruhanga w'Eiguru n'ensi, kandi n'Okumwikiriza." Kwikiriza ki? Obutumwa obu Ruhanga yaabaire ahaire omuntu orikwetwa Yoshua, okwikiriza obwo butumwa.

46 Yoshua akaba aine okwikiriza omu butumwa bwe, nk'oku Musa yaabaire aine okwikiriza. Musa ebintu bikamugyendera kubi, waashusha otu akaremwa emirundi mingi, kwonka akasingura kandi yaafeera aha Rukiri. Baamarai ka baamukiriza bamutwara.

Ai Ruhanga, ka mbe nikwo naafa. Ka mpamire aha butumwa bwangye okuhitsya obu, ekiro kimwe, ku ndiba ndi haihi kufa, ndireeba orwo Rukiri rundi aha rubaju. Yoshua ahamiire aha butumwa bwe. N'obu yaabaire aine . . . Ruhanga naabugumya buri oburikwera, ahabw'okuba akahamira aha Kigambo.

Hati, Rahabu akamanya ngu Yoshua aine obutumwa obu. Hati otakifeerwa. Ebintu ebyo obigumye omu mutima gwawe. Yoshua akaba aine obutumwa; Rahabu yaabwetegyereza atakareebire ekintu kyona. Akamanya ngu Yoshua aine Amaani ga Ruhanga agaabaire nigaza kukubuura egoy nsi. Yaashaba kugirirwa embabazi. Ruhanga yaamugirira embabazi. Hati Yoshua ku yaahikire omuri egoy nsi, hatariho kubanganisa, nitumanya ngu tibaramwitsire.

Kandi ogundi murimo gw'amaani ogu Yoshua yaabaire atumirwe kukora, gukaba guri ogw'okubaganisiza abantu egoy nsi.

47 Hati ijuka, "Ekitabo eki eky'ebiragi kitarikuruga omu kanwa," ahakuba akaba aine Ekigambo kya Ruhanga. "Nk'oku Naabaire ndi na Musa, kugumirizamu kimwe. Nk'oku Naabaire ndi na Musa, nikwo Ndigunga naiwe. Tindikuhemukaho. Noobaasa Kumpemukaho, kwonka Nyowe tindikuhemukaho. Kandi ku Orampemukyeho, embabazi Zangye nizimara, buzima Ndyakugumisiriza. Gumizamu noogyenda. Ku oraagume n'Ekigambo Kyangye, Ninja kukureeberera."

48 Hati akaba naateekwa kubanganisa egoy nsi, kandi zikaba ziri enganda ikumi na ibiri z'okugibaganisiza. Mbwenu shi kuri yaabaire ainemu abu atarikufaho n'abu arikukunda munonga? Mbwenu shi kuri yaabaire naakunda ab'oruganda rwa Gaadi munonga okukira abo ab'oruganda rwa Efuraimu? Ab'oruganda rwa Yosefu munonga okukira ab'oruganda rwa Yuda? Kwonka tarakikozire atyo. Akagibaganisa kurugiirira aha Kigambo ekyashuurwirwe Omwoyo. Akabaganisa kurugiirira aha ruganda. Kandi, yetegyereze, akakikora ahabw'okushuuuruurirwa, ahabw'okworekwa. Akakikora, ahabw'okworekwa Omwoyo wa Ruhanga.

Buri omwe omuri abo bakazi abazaire b'Abaheburaayo, ku baabaire nibazaara abo baana, bakabeeta amaziina gaabo. Kandi buri rimwe omu maziina gaabo riine amakuru.

Yakobo, ku yaazairwe, ahabw'okuba empasha, nyina akamweta "omushwashumi," Yakobo. Kwonka ku yaatungire amaani ge agarikusingura, kandi akafukaana na Maraika, Ruhanga akahindura eiziina rye Yakobo ryaba Israeli, "omunyiginya."

Eiziina riine ekintu eki ririkukora aha magara gaawe. Petero, omujubi, ku yaaherize kusingura, ahabw'okwikiriza kwe omuri Yesu, Akagira ati, "Eiziina ryawo ori Simooni. Kwonka naaza kukweta Petero, ekirikumanyisa 'orukiri.'" Nirikuhindura. Eiziina ryawo riine akakwate n'amagara gaawe, kandi n'eki oriba omu magara.

49 Kandi ekintu kikuru eki ku kyabaireho, buri omwe omuri aba bakazi abazaire b'Abaheburaayo, omu kurumwa ebisha kwabo omu kuzaara, ku yaabaire agamba n'amaani, eky'okureeberaho ati, "Reubeeni," ekyo kikaba kimuta omu mwanya gwe omuri Palesitaini, buzima nk'oku ogwo mukazi omuzaire yaabaire agamba, akeeta eiziina rye, akarigamba. Tingahandiikire hanu goona. Kwonka, eky'okureeberaho, Reubeeni nirimanyisa "omuriisa w'entama." Gaadi nirimanyisa "omutungi w'ente." Kandi Efuraimu nirimanyisa "omuhingi w'ebicoori."

Hati, ahabw'okworekwa omu buryo bw'omwoyo, Yoshua, omwebembezi musya, ahabw'okworekwa omu buryo bw'omwoyo, akata buri omwe omu mwanya gwe, yaabaganisa egoy nsi omu bwinganisa.

50 Eky'okureeberaho kirungi munonga ebiro ebi, eki turikwetegyera Yoshua, ebiro ebi. Omurabanamu

eriizooba, ku turikuhika omu Nsi yaitu eyaaraganisiibwe, Gaadi naayenda ngu ariise entaama nka Efuraimu, omwe naayenda kuriisa ekintu nk'eky'ondiijo. Boona nibenda ngu bashushane. Ka Ruhanga ahe omuntu omwe ekiconco ky'okutamba, buri muntu naayenda ekiconco ky'okutamba. Efuraimu na Gaadi, n'abandi boona nibenda ngu bajwangye, boona bakore ekintu kimwe. Kwonka tubaganisiibwemu, omu myanya yaitu. Boona tibaine ekiconco ky'obwengye. Boona tibarikuragura. Boona tibarikugamba omu ndimi. Boona ti baanabi. "Kureka Ruhanga ataire omu Kanisa, bamwe ab'okuragura, abandi ab'okugamba omu ndimi." Nitwenda boona kubahindura ab'okugamba omu ndimi. Nimureeba okubuzabuzibwa oku? N'ahabw'ekyo tihariho ahu murikubaasa kuhika. Mpaho, Abafelistia bakaabasingura, omu kaanya kakye munonga. Buzima. Kwonka buri muntu, ku yaabaganisiibwe omwebembezi, ahabw'okworekwa omu buryo bw'omwoyo kandi akabata omu mubiri, bakagumamu kandi baaba abarikukirayo oburungi omu nsi.

Ai Ruhanga, tuhe Yoshua. Ai Ruhanga, garuka otuhe Yoshua oraije kuguma n'obutumwa n'Ekigambo.

Okwo nikwo Ruhanga yaamugambiire. "Ekitabo eki eky'ebiragi kitarikuruga omu kanwa, kureka ogume nookiteekateekaho nyomushana na nyekiro," ahakuba akaba aine omurimo omu maisho ge.

51 Hati, Yoshua ka yaabaire omwebembezi w'amaani, atarikusingurwa omu rugamba na kakye shana haagira ekyashoba omu kanisa. Akani ku yaatwaire omuhimba, zikaba zitari mbeera za Yoshua, okwikiriza okwakikozire. Kikaba kiri, akatwara eki jwaro ky'Omunyabulooni hamwe n'omuhimba gw'ezaabu, kuruga omu rusiisira. Kandi ku yaakikozire, kya-kyaremesa orugamba rwona.

Membu omwe yaashaasha; baamemba boona nibashaasha. Eki Ruhanga arikwizira, kimwe omu biro ebi, o'w'eishe-emwe, n'Ekanisa etaine ibara n'obu gwakuba omufunya. Naizira Ekanisa ejiwire Omwoyo, erikwebemberwa Omwoyo wa Ruhanga, abarikukwatanisa munonga omu mitima yaabo, kuhitsya obu baraagyende nk'omuntu omwe.

52 Orugamba, rw'okubuzabuzibwa oku kwona, niruteekwa kusingurwa. Omumetsodisiti ahikire, Omubaputisiti ahikire, Omupuresibateeri, Omupentekoote, Omunazarayo, owa Pilgrim Holiness? Ebigombe by'amadiini magana mwenda na makumi mukaaga na mwenda ebitari bimwe, otabariiremu aba Budha hamwe n'abandi, ab'endijo miringo yoona. Turahi? Hariho ekishobire. Hariho ahu omuhimba gw'ezaabu guri omu rusiisira. Yoshua yaateera enteenyu.

Ka ngambe eki, akasheeshe aka, nka Eliya aha Kibungo Karumeeli. "Ruhanga ku araabe ari Ruhanga, reka Agarukyemu nka Ruhanga." Ebigombe ky'Ababaputisiti ku kiraabe kihikire, ka tubareebe nibakora obumanyiso bwa Yesu Kristo. Abanazarayo ku baraabe bahikire, ka tubareebe nibakora akamanyiso, nibakora ebi Yaakozire. Abapentekoote ku baraabe bahikire, ka tubareebe nibakora ebi Yaakozire. Obwo nitwija kumanya.

53 Abakuratsi ba-ba Yoshua bakagira bat, "Nitwija kukukuratira obwire bwona twaba nitureeba Ruhanga naakora naiwe nk'oku Yaakozire na Musa."

N'ahabw'ekyo abakuratsi ba Yesu Kristo bashemereire kugamba ekintu nikyo kimwe. "Nitwija kukora naiwe ku turaareebe obumanyiso bwa Yesu Kristo nibukukuratira. Ekyo nitwija kukikora." Ekyo nikyo tushemereire kukora. Ekyo nikyo ekanisa eshemereire kugamba. Egyo niyo eshemereire kuba emitwarize y'ekanisa Enkristaayo. Obwo nimubaasa kuta omu buteeka abarikukoresa, ebiconco, akamanyiso. Omuntu omwe ku araabe ari Omutambi, ekyo tikiine kakwate n'ogwo orikugamba omu ndimi. Ogwo orikugamba omu ndimi taine kakwate n'ekiconco ky'okuha obunabi. Mwareeba? Twine ebicweka ebitarikushushana by'obuheereza obu.

54 Hati, Ruhanga obu yantuma. Ebi byona naabiteeraho omusingye, enyima, ahabw'ekigyendererwa eki kimwe. "Ebiconco n'okweta kwa Ruhanga tibyegamira okweteisa." Tihariho muntu orikubaasa kwekora ekintu kyona. Ruhanga akukora eki ori, ahabw'embabazi Ze. Titwine muringo gwona ogw'okukikora, itwe twenka. Yesu akagira ati, "N'oha orikubaasa kwongyera aha rugyero rwe ekita na kimwe ahabw'okwemereza omutima?" N'oha orikubaasa kwekora muhango okukiraho nari mukye okukiraho, ahabw'okwemereza omutima? Torikubaasa kukikora.

Ruhanga ku yantumire, nkakibanganisa. Naagira nti, "Ndi otarikubaasa, nimmanyisa tindikubaasa. Tiinyine bwegyese. Tindikubaasa kukora ebintu ebi."

Kandi baingi omuriimwe abari aha akasheeshe aka, na hati mukiriho hanu eriizooba. Obu Yaareebeka ahaifo hanu aha mugyera, omuri egoo nshusha y'Enyomyo y'Omuriro, kandi akeemerera aho akagamba. Reero akagira ati, "N'oku Yohaana Omubatizi yaatumirwe, o'w'okubandiza okwija kw'okubanza kwa Kristo, nikwo n'Obutumwa bwawe buribandiza Okwija kwa Kabiri."

55 Reeba eki kyakozire. Ekyo Kyererezi ekiri hari, bakakita omu mpapura z'amakuru, kyabuga hoona omuri Amerika kandi kyahika n'omu gandi mahanga.

Dokita Lee Vayle, aho, akaba ari omuri Canada obwire obwo. Naijuka obu kireebeka omu rupapura rw'amakuru orwa Canada, ningira ngu nikwo. Tikwo, Lee Vayle? Omu rupapura rw'amakuru orwa Canada, "Ekyererezi ekitarikwetegyerezibwa kireebekire ahaiguru y'omutwe gw'omuheereza obwo ariyo naabatiza."

Bwanyima abantu baagira bati, "Ni saikologye."

Kwonka eizooba rimwe Ruhanga akasharamu okubumba akanwa k'abatarikwikiriza, 'habw'okuba egyo Nyomyo y'Omuriro ekaba neehamibwa Ekigambo. Eggo Nyomyo y'Omuriro eyaa yebembeire Abaisraeli, niyo emwe ebiro ebi, erikwebembera Ekanisa y'omwoyo, nk'oku Yaagyebembeire omu buryo bw'omubiri. Akagaruka yaareebeka, baateera ebishushani omu maisho g'abakyemi n'omu maisho g'abashwijumi. Hati Ngigi hanu omu kishushani ekihanikire, Amazima gonyini; neekora emirimo niyo emwe, neeyebembera abantu omu buryo bw'omwoyo, nk'oku Yaabeebembeire omu buryo bw'omubiri enyima okwo, neeguma n'Ekigambo. Hati akagamba eki obutumwa bwabaire buri. Hati oijukye, Ruhanga taryebwa obutumwa Bwe. Ku . . .

56 Ninkunda kukiteera ekishushani kubooreka, nari omuringo ogwo. Nituza kukyoreka omu muringo nk'ogu hanu. Nkaka hanu akamanyiso kakye, obwo nibwo butumwa. Hati, hanu hariho omusharaba mukye, omu nshonda emwe; na Baiburi, omu nshonda endijo; kwonka ebihandiiko biri rwagati, hanu, obwo nibwo butumwa.

Ninkwehanangiriza omu maisho ga Ruhanga, na Baamaraika abaatoorainwe, na Yesu Kristo. Okutumwa kukaba kuri, "Shabira abarwaire."

Ekibuuzo kikaba kiri ngu, "Tindikubaasa kukikora."

"Nikyo waazaariirwe. Aga nigo makuru g'okuzaarwa kwawe okutari kwa butoosha hamwe n'amagara gaawe, ku ori ow'okuza kushabira abarwaire. Ku oraabajtsye aha kukwikiriza, kandi okaba omwesigwa waashaba, tihariho ekiriremesa okushaba kwawe, n'obu yaakuba ekookoro." Ni bangahi abaashomire ekyo, omu myaka mingi egi yoona? [Abateeraine baagira bati, "Amiina." -Omur.] Kibugire ensi yoona.

57 Hati, hati nkagira nti, "Tindikubaasa kukikora, ahabw'okuba nindemwa kukikora. Tibarikwija kuunyikiriza. Ndi omworo. Tiinyine bwegyese." Ogwo niinye owaabaire naabanganisa.

Yaagira ati, "Nk'oku Musa yaahairwe obumanyiso bubiri kuhamya okutumwa kwe, nikwo wa . . ." Ti "noija." "Waaheebwa obumanyiso bubiri. Kamwe aharibwo nikaza kuba okukozesa omukono gwawe. Akandi nikaza kuba ngu nooza kumanya emibonano yonyini y'omu mitima yaabo, ebi barikuteekateeka omu biteekateeko byabo. Kandi ahabw'obu nibaija kwikiriza, ahabw'obumanyiso bubiri obu." Hati ijuka. E . . . Hurikiza. Eki kitakurabaho. Akamanyiso tiko butumwa. Akamanyiso nikahamya obutumwa.

Waahika aheeru hanu aha muhanda okareeba akamanyiso, akarikugira kati, "Mahiro itaano kuhika Jeffersonville." Ako kamanyiso tiko Jeffersonville. Ako n'akamanyiso akarikukworeka ku ori omu muhanda oguhikire. Mbwenu shi kuri . . .

58 Musa, obu ashuma eifo okwo, akaba aine akamanyiso, k'enkonu n'omukono gwe. Akamanyiso hanu tikari obutumwa nk'oku katarabaire bwo ahari Musa. Mbwenu shi kuri Abaisraeli boona baagizire bati, "Kazaare, imwe Abanyamisri mwena, imwe Abaisraeli mwena abaatsigara, mwije hanu. Twine omuntu orikubaasa kukora omugyereko n'omukono gwe. Mushemereire kugureeba. Twine omushaija orikubaasa kukwata enkonu akagikoramu enjoka. Mwije, mugureebe?" Ekyo kikaba kiri ekyapa ky'endagiiriro. Obwo bukaba butari butumwa. Bakaba batategyereize ekyapa ky'endagiiriro. Ruhanga atuyambe. Bakaba bategyereize okujunwa.

Kandi egi nsi enshoberwa, erwaire, ezingazingirwe etegyereize kucungurwa, kwonka amaisho egahangire ekyapa ky'endagiiriro. Otugirire embabazi! Ekyapa ky'endagiiriro ti kindi kureka akamanyiso k'okuhamya obutumwa. Mbubwo aho obuheereza busya. Niho bunshuuuruuirwe. "Shabira abarwaire. Hitsya abantu aha kukwikiriza." Ekyo Ruhanga tarikubaasa kukitsigaho. Okwo n'okuragiira Kwe, n'obu haakubaho ki, n'obu naakuremwa nta. Ndemwa kubi munonga. Nkaba ntashemereire kugumizamu n'obwo bumanyiso. Okwo kukaba kutari kukunda kwa Ruhanga, kwonka Ruhanga akihare omugisha, n'obu kiraabe. Kwonka nyeteekateekire kuruga ahari oru rushozi. Niinyenda kwambuka Yorudani, niinyenda kutwara obutumwa obu. "Hitsya abantu aha kukwikiriza."

Naagira nti, "Tibarikwija kuunyikiriza."

"Noija kwongyerwaho obumanyiso bubiri."

59 Hati omurabanamu gwakyo ni ngu, tugumire nitureeba akamanyiso. "Oo, Ow'eishe-emwe Branham! Waareeba? Waamutaho omukono gwawe, oo, oshemereire kureeba ekirikubaho. Mwemerere omumaisho Omwoyo yaaba amuriho, naakugambira buri kintu ekiri omu mutima gwawe." Ago n'amazima.

Nkataaha omu irwariro hanu, ijweriho. Hakaba harimu baadokita, tibarabaasize kumanya eki ogwo mukazi yaabaire arwaire. Baadokita ku baarugire omu kishengye, ogwo mukazi yaagaruka enyima. Kandi yaayemerera, aha kitanda kye yaagira ati, "Baagira ngu tihaine eki banshangamu, eki ndwaire." Ati, "Ow'eishe-emwe Branham, noobaasa kungambira."

Naagira nti, "Ku oraanyikirize, nimbaasa."

Yaagarukamu ati, "Niinyikiriza."

Reero Omwoyo Orikwera yaagira ati, "N'ekintu eki n'eki. Nikyo ekyo. Buzima. Reeba ekyo ku kiraabe kitarikyo." Ogwo mukazi ni memba w'ekanisa ya Junie Cash.

60 Ondijo mukazi owaabaire ari aho, yaagira ati, "Omugongo gwangye." Ati, "Tibarikubaasa kumanya ekyagurwaize."

Naagira nti, "Noonyikiriza ku ndi nabi We?"

Yaagarukamu ati, "Ninkwikiriza."

Naagira nti, "Ekyabaireho, enyima okwo omu kutandika kw'okwezi Kwamukaaga, iwe . . . Niba-nibagyezaho kukujanjaba, kandi n'okugyezaho kushemeza eigufa ry'oruti rw'omugongo ngu rirugire omu mwanya gwaryo. Tikwo kiri. N'omutsi ogumigirwe. Okakiiha omu kuterura emigugu, obu waabaire nookora omu Katare ka McSpaddin.

Yaagira ati, "Naijuka obu kyabaho. Hati naakijuka."

Ekyo tikikaamutambira. Ekyo nikyorekyereza aha butumwa kwonka. Murekye kwegamira ekyapa ky'endagiiriro. Ka tugumizemu tuze omu rurembo. Ka turugye ahari oru rushozi. Ka tuhikye omu rurembo. Ka twambukye Yorudani.

61 Nshobize. Nkozire enshobe. Egyo niyo nshonga etumire naabuurrira aga mashomo nk'oku ngabuuriire. Habw'okuba, Akagira ati, "Nk'oku Naabaire ndi na Musa, nikwo Ndigunga naiwe," kandi ogwo Mukono obu gwashuuma gukooreka ekyo Kyahandiikirwe kyonyini. Mazire obwire buraingwa niinyebuuza, ahabw'okuba nkaba ntarikumanya eki okutumwa kwabaire kuri. Ntwire ninsherura ekintu ekirengire eby'obuhangwa ekirikukira ahari ekyo. Ruhanga tarikubaasa kuruga aha butumwa Bwe. Ruhanga akaha obutumwa, okwo nikwo burikuteekwa kuguma.

Kwonka Abapentekoote boona nibakunda obumanyiso. Nibakunda kubureeba. Baiburi neegira eti, "Ab'obusingye obubi obw'obushambani nibenda akamanyiso." Kwonka okutumwa kukaba kuri ngu, "Shabira abarwaire." Kandi emitwaro okuteezamu enkumi z'abantu, abu ndemirwe kushabira, ahabw'okuba boona bakaba nibenda akamanyiso. Boona nibakeetenga.

62 Ekiro kiri, nkaba ningyezaho kukozesa obuheereza, naataaha omu kishengye. Reero omushaija yaija aha kituuti, yaagira ati, "Hati, Ow'eishe-emwe Branham, rindaho kakye. Oburwaire bwangye n'obw'omutaano. Nintekwa kugira eki naamanya." Naagira nti, "Kare, dokita naabaasa kukukyebera."

"Oo, ekyo tindikukyenda. Ni-niinyenda kumanya hati hati. Oburwaire bwangye n'obw'omutaano munonga."

Naagira nti, "Mbwenu, niinyanga kukora eki, ow'eishe-emwe." Naagumizamu naakitaahamu. Kandi eky'okubanza noomanya, Omwoyo Orikwera yaija.

Yaagira ati, "Mukama asiimwe. Ekyo kihikire."

Naagira nti, "Naimwe abandi, kyo nimwije hati. Mwije mbashabire."

Ku naakozire ekyo, nimumanya ondijo eki yaagambire? "Endwara yangye n'ey'amaani nk'eye." Reero naashabira nka mukaaga nari munaana, ntyo naasiibuura oruteerane. Kikenda kuunyita.

Nkaba nyebuuza obutoosha, ahabw'enki ekyo kyabaire kimbaho? N'ahabw'okuba naabaire ninkikora kubi. Ekyo n'ekyapa ky'endagiiriro ekirikworeka okutumwa kwonka. Ti butumwa. Ekyo kyapa ky'endagiiriro kihamiibwe, omu nsi yoona. Kandi omu ndimi za, Afrika, India, Asia, Buraaya, okwehinguririza ensi yoona, kurabira omu mitwaro na zaamiriyoni z'abantu, nibamanya eby'ekyo kyapa ky'endagiiriro. Nyetegwire kuruga ahari oru rushozi. Niinyenda kugumizamu nze seeri ya Yorudani. Niinyenda kugira eki naataahamu seeri, ahu okwikiriza kwangye kuraije kwimuka kukahika ahantu, ku ndaashabire abantu, bakire.

63 Reeba, Ruhanga naakigarurira kimwe omu bujunaanizibwa bw'abantu. "Ekyatumire waazaarwa n'okugira ngu oshabire abarwaire. Kuri noobaasa kubahitsya aha kwikiriza."

Naagira nti, "Tibaraije kwikiriza."

Yaagira ati, "Ninza kukuha obumanyiso bubiri, kandi ahabw'obwo bumanyiso nibaija kwikiriza." N'ahabw'ekyo, yetegyereze, obumanyiso obu, beeteeraine ahabwabwo, ebyapa by'endagiiriro, omu mwanya gw'obutumwa. "Noikiriza ngu okatumwa kushaba."

Hati abantu ku baija omu runyiriri, kushabirwa, ahonaaho omuntu omwe ku ahika ati buzima ahu . . . Tihariho ekintu na kimwe eki ndikubaasa kukikoraho batakahikire ahantu aho. Kandi ku bahikaho, reero ngira nti, "Ninkuha . . ."

64 Hattie Wright, ogwo mukazi, ningira ngu ari hanu akasheeshe aka, ashutami aho buzima. Niwe yaabaire ow'okubanza, obu tureeba ezo kaamugye; kandi yaamanya obutumwa ahari ekyo, kandi n'obu Ruhanga yaahanga

ebintu egoye mirundi mushanju ekurataine. Nkagira nti, "Ogwo niwe Ruhanga otahinduka owaabaasize kuhangira Abrahamu empaya y'entama, okumwikiririsa obutumwa bwe; niwe Ruhanga ogwo orikubaasa kuhanga kaamugye, ahabw'okuba egoye niyo naabaire nkyenire."

Hattie Wright mukye owaahama aho, oshutami enyima omu kyombeko eki. Akaba naikiriza, omutima gwe akaba atagutaire aha bintu by'ensi. Akagira ati, "Ow'eishe-emwe Branham, ekyo ti kindi kureka n'amazima gonyini." Tarakigambire kuruga hanu. Ruhanga akagambira omu mutima gwe.

Naagira nti, "Hattie, shaba eki orikwenda. Nkikuhe."

Yaabuuza ati, "Nshabe ki?"

Naagira nti, "Oine sho omugurusi na nyoko abashutami aha. Oine murumuna waawe oremahaire." Na hati akiri omuri ako kagaari. "Noobaasa kumushabira. Noobaasa kushabira nyoko, sho. Ori omukyene. Toine sente. Shaba eki orikwenda."

Yaagira ati, "Mbweni, tindikumanya eky'okushaba." Ati, "Buzima tindikumanya." Yaagira ati, "Ekyetengo kyangye kikuru munonga n'okujunwa kwa batabani bangye babiri."

Naagira nti, "Naakuha batabani baawe, omu Iziina rya Yesu Kristo." Buzima bombi bakahindurwa, nibakunda Mukama Yesu. Bombi bakabatizibwa omu Iziina Rye, nibaheereza Ruhanga, burijo, n'omutima gwona.

65 Ed Daulton, aine ahu ashutami hanu, haifo hanu honyini. Abaana be, ekintu nikyo kimwe.

Nkareeba, omu hururu y'okubuurira, abantu abatari ahansi ya magana munaana nari magana mwenda, obundi rukumi nibaraba aha kituuti, omu ruteerane, omwe omwe. Eky'okubanza noomanya, ngyenda mbashabira. Buzima, bakira. Kandi ngugu hanu omwishiiki muto yaija, ari haihi kwitwa ekookoro y'omu shagama. Buzima, nimmanya ekishobire aha mwana ogwo. Tihariho n'omwe aharibo ou naagambiire ekigambo kyona. Kwonka ogwo mwana ku yaahikire aho, nkagira nti, "Mukundwa, naakuha eki orikwetenga omu mutima gwawe. Orwaire ekookoro y'omu shagama. Mbweni irooko okire, omu Iziina rya Mukama Yesu."

Naahinduka naareeba abateeraine. Naagira nti, "Nimpiga omuntu weena ori aha. Twara ogwo mwishiiki owa dokita, amukyebere, reero orebe yaaba aine n'obu kaakuba akatoonyezi koona k'ekookoro y'omu shagama." Ahabw'enki? Ogwo mwana akaba yaahuriire, nka Rahabu maraaya. Ogwo mwishiiki akakiiriza n'omutima gwe gwona. Reero Ruhanga, kurabira omu Mwoyo We, yaija aho yaagira ati, "Niwe ogwo." Amagana n'amagana bakaraba aha kituuti, hatariho, nk'oku ndikumanya, ekintu kyona eki baatunga. Nkafa kubashabira.

66 Kiri aha bantu, "Ku muraikirize." Obutumwa bukaheebwa. Ekyo nikyo ekyabandize. Ekyapa ky'endagiiriro kiteirweho. Hati ku muraabe nimubaasa kwikiriza ekyo, ku muraabe nimwikiriza ngu Ruhanga akantuma omu nsi kushabira abarwaire, nimbaasa kubashabira okushaba okurimu okwikiriza. Ogwo nigwo muringo gwonka ogu kirikubaasa kukorwamu.

Ruhanga tarikubaasa kuruga aha butumwa Bwe. Muhemukireho. Mazire hanu, nk'emyaka ikumi na ina, ntaine kindi kyona kureka ninkozesa ekiconco ky'okumanya ebiri omu mitima y'abantu kwonka, okwehinguririza, okwehinguririza ensi, okuhitsya obu emitwaro n'emitwaro y'abarwaire, miriyoni, ningira. Nimbabuza ekintu kimwe, kuraremire? Ngaaha, sebo. Mbweni ekyapa ky'endagiiriro ku kiraabe kitarikubaasa kuremwa, obutumwa bwo tiburukiraho munonga okutaremwa? Akamanyiso, ako n'akantu kakye; akamanyiso akarikworeka ei orurembo ruri, ku karaabe katarikubeiha omu kukumanyisa ngu orurembo ruriyo, mbweni orurembo tiruraije kukiraho munonga kushangwayo waahikayo? Obwo nibwo butumwa.

67 Hati obuheereza bwangye buriyo nibuhinduka. Bwaherize kuhinduka. Nabwo ekiconco ky'okumanya ebiri omu mitima y'abantu nikiza kugumaho. Nabwo nibiza kugumizamu nk'oku ndaabe ninyejuriramu Ruhanga arikwenda ngu mbigambe. Kwonka okuhitsya obwire obwo, ninja kushaba, nte engaro aha barwaire, nk'oku Yangambiire kukora, reero nkore eki yantumire. Eki nkitegyereize obwire burasingwa, kwonka niinyikiriza ngu hati tweteekateekire kukubuura Ensi eyaaraganisiibwe. Buzima nk'oku haraije kubaho, nihaija kubaho ba Rahabu bategyereize, nihaija kubaho omuntu otegyereize oraije Kukiiriza n'omutima gwe gwona.

Mwayetegyereza? Omuntu weena owaakyetegyereza gye, ayereeze omukono gwe. [Abateeraine baagira bat, "Amiina." -Omur.] Ni bangahi abarikwikiriza ngu buzima ekyo n'eky'Ebyahandiikirwe? ["Amiina." -Omur.] Buzima n'eki Yaagambire. Obu nibwo butumwa; ebi n'ebypa by'endagiiriro ebirikworeka obutumwa.

68 Hati nimpiga omuntu weena kungambira, hoonahoona omu nsi, aha ntambi z'amaraka ezi, hoona ahu zirikubaasa kuhika, kuunyoreka omurundi na gumwe obu Araremirwe kugamba aha kituuti, nari aheeru omu kworekwa kwona nari ekintu kyona, ekyabaire kitahikiire kimwe, ekitarahikiriire nk'oku Yaakigambire. Akagambira buri mutnu omurabanamu gwe gwonyini, na byona ebimukwatsireho, n'ai baabaire nibaruga, kandi na byona ebi bashemereire kukora. Kandi buri kaire ku Yaabaire agira ati OKU NIKWO MUKAMA ARIKUGIRA aha kintu kyona ekikwatsire aha kutambirwa, nikwo kyabire kiba. Ku oraabe noomanyaho n'omwe, omanyise. Ninja kutaho orwo orutambi rw'amaraka reero nkimanye. Tikakaremwaga, omuri egi myaka miraingwa ikumi na ibiri, nari emyaka ikumi na ina. Tikakaremwaga, ahabw'okuba tikarikubaasa kuremwa. Ruhanga niwe yaahaire aho

kamanyiso. Tikarikubaasa kuremwa.

Kandi Ruhanga atakahaire akamanyiso, Akatuma, hatakabaireho akamanyiso k'okworeka obuheereza. Hatakabaireho akamanyiso k'okworeka ei orurembo ruri, nihateekwa kubanza habaho, orurembo, rw'okworekwa. Ku oraabe okiikiriize n'omutima gwawe gwona, nooza kukiheebwa. "Okushaba okurimu okwikiriza kuryakiza ogwo orwaire, kandi Ruhanga aryamwimutsya."

69 Hati, nyegamiire munonga aha kyapa ky'endagiiriro, nyowe nyenka. "Mukama, Nyoreka eby'aba ntakabashabiire, 'habw'okuba tindikumanya eki nshemereire kukora." Ekyo ka kyabaire kibi munonga! Ninshaba abahurikiize kunsasira. Abahurikiize omu nsi yoona, abahurikiize orutambi rw'amaraka oru, munsaasire. Nkashobya. Nkaba ntashemereire kukikora ntyo. Okwo kukaba kutari okutuma Kwe okubanza kwa byona. Ako kakaba kari akamanyiso k'okworeka okutumwa. Nkaba nshemereire kushabira abarwaire, hoona hoona.

Hati, reeba, kigarukiire kimwe omu bujunaanizibwa bw'abantu, ku muraikirize ngu eki Ruhanga akakiragiira ngu kikorwe. Nkiki hanu omu Kigambo, buzima kiri hamwe n'Ekgambo, okutumwa. Ningira . . .

70 Ninteera ekishushani hanu n'engaro, ekiitirirwa, omuhanganzima. Egyo n'endagaano, ei Ruhanga yaakozire n'abantu. Akakora endagaano n'oruganda rw'abantu, ku Atarigaruka kucwekyereza ensi n'amaizi bundi. Akakora endagaano n'entumwa Ze zonna. Akakora endagaano na nabi.

Kandi enyima okwo, nk'emyaka ikumi na itaano, ikumi na ina, ikumi na itaano ehwire, omuri 1937. Okwakataano ebiro 7, 1937, ningira ngu nikwo. Obwo, Ruhanga akakora endagaano naanye, naagira ati, "Okazaarwa omu nsi egi, kushabira abarwaire. Ku oraabaase kubahitsya aha kukwikiriza . . ." Omutima gwangye obutoosha gukaba gukunda abantu. "Ku oraahitsye abantu abo aha kukwikiriza, kandi okaba omwesigwa waaba nooshaba, tihariho ekintu kyona ekirirema omu maisho g'eshaara yaawe."

Ningamba eki ntarikubeiha kandi nyine enshoni aha maisho. Ku haraabe hariho omuntu oshemereire kugira okwikiriza, akaabaire nyowe. Okureeba eki Yaakozire, ahu Yaanyihire, ekiina eki naihirwemu! Okureeba, omu magara gangye goona, ebi Akozire! Nimureeba, naayemerera haza nkagira eki naagamba, Ruhanga naizira kimwe aho akishagikye, n'amazima.

71 Emyaka mingi ehwire, obu naabagambiire ngu hariho Maraika owaanyiziire omu rushaka. Obu naabaire nyine emyaka eshatu yonka, Ekyererezi, akasooroora nkeetoroora omu rushaka, reero yangambira, "okutarireetsa, okutanywa amarwa, nari ekindi kintu kyona," ngu nihaija kubaho omurimo ogu ndikora naaheza kukura. Ekyo mukaba mwine obugabe kukibanganisa. Mukaba mutaine bugabe, kwonka mukaabaasize kukibanganisa.

Ahaifo hanu aha mugyera, obu Ashuuma kandi Akahamya We wenka ku niwe ogwo. Eruguru ahu twabaire twemereire, baingi omuriimwe abashutami hanu akasheeshe aka mukaba mwemereireyo, muriho. Ekyo baingi omuriimwe nimukimanya ku n'amazima.

Baingi omuriimwe nimwijuka obwire obwo obu naatumwa. Kandi Akagira ati, "Irooko ogyende, kandi obuheereza obu nibwija kubuga omu nsi yoona, okusisiimuka kutandikye." Habaireho okusisiimuka okwiha obwo okutakabahoga. Okusisiimuka na hati nikukigumizamu, okwehinguririza ensi hati, ehururu z'amaani z'okutamba endwara omu nsi yoona.

72 Kandi nyowe, okuruga aha muntu, akabeba. Eki tindikukigamba okugaya maawe oshutami aho, nari nyakwegyendera tata owaafire, ou orufu rwe rwabuuriirwe aha kituuti aha. Nkakurira omu ka mbi munonga. Nimukimanya. Tihariho n'omwe omuriitwe owaabaire ari Omukristaayo. Tata akaba naanya amarwa. Ruhanga akakwata mutabani w'omusinzi, kandi yaanyozya omu Shagama Ye. Ku naabaire nza omu tauni rwagati kugamba n'omuntu, reero nkitandika kugamba n'omuntu, akaba agamba naanye yaabura ondiijo muntu w'okugamba nawe. Ku haabaire haija omuntu, ka tugire ngu n'ondiijo muntu weena, n'obu yaakuba yaabaire ari oha owaabaire aija, bakaba bantsigaho nyenka ahabw'okuba nkaba ndi mutabani w'omusinzi. Kandi baingi hanu omu kanisa yangye nimumanya ngu ago n'amazima. Nkaba nyine eiziina nk'eri ntaka . . . nari nk'ery'enyamaishwa nari ekindi kintu. Nangwa rimwe kikagambwa ab'omu rurembo, baagambira omuntu omwe owaahikire aha nju yaitu, baagira bat, "Okaakwatanisa na kasasiro nk'egyo?" Oo! Kwonka, Ruhanga, nkaba nyine ki kugira ngu ngumizemu etari Shagama ya Yesu Kristo. Tiinyine bwgyese. Tiinyine kitinisa. Tiinyine kintu kyona.

73 Nkagambira omukazi wangye, enshumi nkye ehwire nti, "Teekateeka oku kyabaire kiri obu haabaire hatariho omuntu n'omwe owaabaire naabaasa kugamba naanye. Kandi ninkunda abantu. Bakaba batarikubaasa kumpurikiza." Niinyijuka ndikushoma ekitabo, ndiyo ninza aha ishomero . . .

Nkoohereza abaana bangye aha ishomero, ijweri. Mbaasize kubagurira ebitabo n'ebindi. Ka nshemereirwe! Nkaba nza aha ishomero, ntajwaire enkaito, eishokyе ringwire omu bitsya; ntaine bijwaro; njwaire akakooti kakuzire, ntajwaire esaati omunda yaako. Nkaba ntaine nangwa n'ekaraamu y'ekiti, nari orupapura rw'okuhandiikaho. Nkaba ntiiza ekaraamu y'ekiti, ekaraamu y'esente nkye hamwe n'orupapura, kuhandiika ebibuzzo ebyabaire biri aha rubaaho, nari ekindi kintu. Hataraho kintu kyona. Ekyabaire kigwire . . .

74 Niinyijuka ninshoma omu kitabo, eizooba rimwe, ahu Abraham Lincoln yaarugire o-omu ryato yaashuumma

omuri, nintekateeka, New Orleans. Ari okwo akareeba, abaana bato b'Abairaguju, beemereire omu iriisizo, n'ebigyere byabo bikye, ahu ente ekuzire yaabaire eraire ekiro kyona, biriho orubaare orurugire ahansi. Kandi aka . . . Bakaba beemereire aho nibeshongora bati, "Ojwaire enkaito, naanye njwaire enkaito, kandi abaana ba Ruhanga boona bajwaire enkaito."

Ku yaarugire omu ryato, yaaranzya. Omu kiju ky'enumi, hakaba heemereiremu omushajja w'omwiraguju w'amaani muhango, ori gye omu mubiri ayemereire aho. Omukazi we mukye akaba aikiire omwana omu mikono ye, naarira. Bakaba nibatunda iba aha muguzi orikuhayo esente ezirikukirayo, kugira ngu bamukozese abyame n'abakazi bahango munonga, nikwo bazaare abahuuku bahango munonga.

Lincoln akazinga engaro ze nka bati, reero yaateera entomi ze hamwe. Yaagira ati, "Ekyo kigwire." Ati, "Ekiro kimwe ndyakirwanisa, n'obu kyakuunyitisa." Kikamwitisa. Kwonka akakirwanisa, kandi yaakimaraho.

75 Naagira nti, "Oku kunywa amaarwa, oku kushambana, kugwire. Ekiro kimwe ndyakurwanisa. Nkaba ninza kukurwanisa nta, nyine eiziina nk'eri naabaire nyine? Tihariho n'omwe owaabaire agamba naanye. Egyo niyo nshonga eyaatumire naabanganisa okutumwa kwangye. Tihariho n'omwe owaabaire nanfaho. Hakaba hatariho n'omwe, hoona hoona; kureka omu bantu bangye hanu.

Ahabw'embabazi za Ruhanga, nintekwa kuruga omu ka yangye; tindikubaasa nangwa n'okugumamu, ahabw'abantu omu nsi yoona, kuteera esimu. Abantu b'emiringo yoona, abategyekei bakuru, abakama, abagabe, abantu b'amaani, abashuubuzi, abaheereza, kuruga omu nsi yoona, nibaba nibateera esimu; nibateera esimu, nibateera esimu, nibateera esimu, buriizooba, buri kiro. N'enki ekyakikozire? Eshagama ya Yesu Kristo eri omu magara gangye. Nk'oku eshagama ya Abraham Lincoln yaihire orukoba rw'obuhuuku aha mwiraguju; Eshagama ya Yesu Kristo ekaanyihaho orujegyere rw'ekibi. Kandi yaanyihaho eiziina eryabaire riri ribi okukira ery'enyaishwa, yampa eiziina nk'omwana w'e-embabazi Ze.

76 Nyeteekateekire kuza Yorudani, akasheeshe aka. Nyeteekateekire kwemerera omu buheereza bwangye. Ntwire ninkunda abantu. Mbafireho. Ambugaine, omu kworekwa emirundi mingi, ei ntaine bwire bw'okugigambaho, naimwe nimukimanya. Kihandiikirwe hanu honyini, omu mpapura z'enyima y'ebitabo ebi, nikigira kiti, "Oteire omutima munonga aha bantu. Omu mwanya gw'okugyenda Naanye, noogyenda wenka. Orikuta amaani maingi munonga ahari obwo bumanyiso."

Tinkijuka ebini eki byabaire biri, kwonka obunaku buhikire. Obunaku buhikire, ku naareebire Omukono nigushuuma ahari Joshua, yaagira ati, "Nkaba Ndi na Musa. Ndyaguma naiwe." Ninkikiriza, akasheeshe aka. Okuruga hati, eriizooba n'okugumizamu, nimpeereza Ruhanga omu kutumwa kwangye. Ku Araabe naayenda kuunyoreka obumanyiso, nari yaaba naayenda kuunyoreka okworekwa, Naabaasa kubiinyoreka. Ku Araabe atabiinyorekire; tindigaruka kwemerera omumaisho g'abantu, ningyezaho kureetera okwikiriza kwabo kugira eki kwanyihamu, bundi. Ninja kuguma ninshabira abarwaire mbaheylo ahari Ruhanga, reero mbarekye bagyende. Ku baraikirize okutumwa kwangye, Ruhanga n'ohikiriire kandi ow'amazima. Andeetsire yampitsya aha, nk'oku Yaagizire Musa. Nk'oku Yaagizire Joshua, nikwo kibaire.

77 Okushaba kwangye kw'obucureezi kuri ngu, "Ai Ruhanga, nsaasira. Ka nyimukye ngarukye ngeyeho. Mpwera, Ai Mukama. Ka nyebembere abantu aba, mbate omu Kigambo, nikwo tubaase kugyenda, tuhikye ahari Yorudani, tutaahe omu Nsi eyaaraganisiibwe, ahu Ekanisa nkuru ya Ruhanga yoona eyaacungwirwe erijunwa okutagaruka kushiisha bundi." Ekyo n'ekyetengo kyangye akasheeshe aka. Kiikirize, obe ohuriire. Kiikirize, okire. Nimbagambira omu Iziina rya Mukama.

Tushabe.

78 Ai Mukama Ruhanga, Omuhangi w'Eiguru n'ensi, Obukomooko bw'Amagara agatahwaho, kandi Omuhi wa buri kiconco kirungi, k'okusaasira Kwawe n'embabazi bibe aha muheereza Waawe, okubanza, Ai Mukama. Nkozire enhobe omu maisho Gaawe, ahabw'okukozesa kubi ekintu ekitwire kiri eky'Obwaruhanga, ahabw'okuba abantu bakakiinyihaho, Mukama. Ninkushaba, Ai Mukama Ruhanga, okuruga hati n'okugumizamu, onyongyeremu amaani, Ai Mukama, n'Omwoyo Waawe. Niinyikiriza, n'omutima gwangye gwona. Onkize, obutaikiriza bwangye.

Kandi abashajja n'abakazi baaba nibaija kushabirwa, obwo ninza kukora obwire bwona waaba Ompaire omwitsyo n'amagara. Hati ka baikirize, Taata, baaba nibashabirwa. Nkaabaasibwa ki obu butumwa obu Ompaire, mbaasa Kubutwara omu nsi yoona. Kandi ku ndaahikye omu myanya emwe ei ekyapa ky'endagiiriro kiteirwe emisomaari kikahama, ninshaba ku bamanya ngu ekyo nikyoreka obutumwa kwonka. Ninshaba ngu bagire okwikiriza.

79 Ai Mukama, tinkigaruka kutegyereza a-akamanyiso k'omuringo gwona nari ekindi kintu, okungambira ebintu bimwe, nari yaaba omuntu ogu araakire. Naaza kugyenda mbugane omuzigu, nyine okwikiriza omu mutima gwangye. Naaza kumurwanisa, nimpwerwa Eshagama ya Yesu Kristo. Ahabw'Eshagama ya Yesu Kristo, tarikubaasa kusingura.

Hati, ebintu ebi byona ku biraabe bitwire bihikire, kandi byaherize kuhamibwa ku bihikire, nikwo Oraatambire abarwaire ku ndaabashabire, Mukama. N'Ekigambo Kyawe. N'okuraganisa Kwawe. Eki niinyetenga kukikora. Onkize, obutaikiriza bwangye.

Saasira ekibi kyangye, Ai Mukama, ky'Okukugomera. Nkaba ntariikumaya ekindi ky'okukora. Nyowe, ku ndaabe naabaire ninkimanya, Ai Mukama, nkaba ntakakishuuruuriirwe ngu nkyetegyereze. Hati nkishuuruuriirwe kandi naakyetegyereza. Nimmanya ahu nyemereire. Nimmanya obuheereza bwangye. Tindireka Ekigambo eki kikaruga omu kanwa kangye, nyomushana nari nyekiro. Ntuura Ninkishagika, Ai Mukama, Ninkishagika, ningambira abantu. Nti, ku kiraabe kitari Kigambo kya Ruhanga, ninkibanganisaho. Kwonka tinkaabuurira nari kukora ekintu kyona kureka kyaba kiri Ekigambo kya Ruhanga.

80 Ai Mukama, ndiyo ninduha, ahabw'okuguma nigyendagyenda omu mwanya ogu gumwe. Nk'oku ngambire ekiro ekihingwire nti, "Emyaka makumi ana omu ihamba, nibeetooroora oku n'oku, nibeetooroora oku n'oku." Ruhanga naabaha omugisha, eego, nibariisa entaama nibakuza n'abaana, n'ebindi byona, n'amasyo g'entaama n'ag'ente, n'ebindi bingi. Ai Ruhanga, Okabaha omugisha. Kwonka eizooba rimwe Okagira oti, "Mutwire aha rushozi oru omwanya muraingwa ogurikumara. Oo, mwinamukye muze bukiizi-bwa-bumosho, aharikuza Yorudani."

Ai Ruhanga, naatandika, akasheeshe aka. Naaruga ahari ebi byapa by'endagiiriro, 'habw'okuba nibyoreka ei Ensi nungi eri. Nimbaasa kuteera entsibo. Nimbaasa kuraba omu Baamaleki. Nimbaasa kuraba omu Bahiiti n'Abanyakanaani. Nimbaasa kuraba omu kukyema kwangye nyowe nyenka. Ai Mukama, ninza kugumizamu ningyenda. Nimmanya ngu eseeri hariyo Ensi, okwo. Hariho ahandi, embeera zimwe, omwanya ogu turikubaasa kuhikamu, ahu Orikugarukamu okushaba. Kandi eki turaashabe kyona turyakiheebwa. N'obu yaakuba ekookoro terikubaasa kwemerera omu maisho g'eshaara. Ekyo ninkimanya ku n'amazima. Ekyo ninkiikiriza, kandi nkitegyereize, Mukama. Niinyehayo Ahariiwe, akasheeshe aka, ahabw'omurimo Gwawe, omu Izina rya Yesu Kristo. Amiina.

81 Ikiriza kwonka, ikiriza kwonka,

Byona nibibaasika, ikiriza kwonka;

Ikiriza kwonka, ikiriza kwonka,

Byona nibibaasika, ikiriza kwonka.

[Omwanya oguriho busha aha rutambi rw'amaraka -Omur.]

Hati, orutambi rw'amaraka baarwihaho, 'habw'okuba eki nikiza kubuga ensi yoona. Ekyo kyaruga aha mutima gwangye. Mwakyetegyereza, kanisa 'mwe? [Abateeraine baagira bat, "Amiina." -Omur.]

Ruhanga tarikubaasa kugamba ekintu kyona haza akaremwa Kukikora. Ebigambo Bye tibikaarema. Okuraganisa Kwe n'okw'amazima. Obwire bwona, Atwire ategyereize obunaku obu. Mwareeba? "N'okushaba okurimu okwikiriza okukiza ogwo orwaire," ti kamanyiso. [Omwanya oguriho busha aha rutambi rw'amaraka - Omur.] "Ku oraabe noikiriza," Yesu akagira ati, "Nimbaasa. Nimbaasa, ku oraikirize." Hati Ruhanga ku araabe ampare amaani g'okubashabira eshaara y'okwikiriza, kandi akakiraganisa kandi akahamya ngu n'amazima, hati nimwikiriza? [Abateeraine baagira bat, "Amiina." -Omur.] Eki ndashabe, ninkiheebwa, ku muraakiikirize. "Ku oraabaase kuhitsya abantu aha kwikiriza, kandi otabanganise waashaba, tihariho kintu kyona ekirirema omu maisho g'eshaara yaawe."

82 Ow'eishe-emwe, ow'eishe-emwekaza, ku ndaabe naaretengire kuba omwesigwa, ni hati, ahanyima y'enshobe zangye zoona kureebeka. Eki ndikwenda . . . Enshonga etumire naareeta Obutumwa obu, enyimaho, n'okugira ngu Ruhanga naayoreka aho ku n'Omunyambabazi. Musa akakora enshobe ze, omuntu mukuru nkawe. Bwanyima Yoshua ku yaizire, nawe, akaba naaza kukora eze. Kwonka Ruhanga akagira ati, "Nk'oku naabaire Ndi na Musa, nikwo Ndigunga naiwe."

Hati reeba Ruhanga, emyaka ebiri ehangwire, akanyorekyera kyarimwe ekyo Kyahandiikirwe. "Nk'oku naabaire Ndi na Musa, nikwo Ndigunga naiwe. Tindireeba enshobe zaawe." Akamanya ngu obwire obu buryahika. Mbwenu hati buhikire, mwareeba, bugarukiire kimwe ogundi murundi, 'habw'okuba Ruhanga tarikubaasa kukirugaho na kakye.

"Okwikiriza nikwo kwabajunire." Ekyo ni bangahi abarikukimanya? [Abateeraine baagira bat, "Amiina." - Omur.] Baingi nimukimanya, n'obu baakuba abashaija barungi baingi munonga okwingana ki abaraakushabire, n'obu baakuba ababuurizi barungi baingi munonga bata abaraakubuirire, nooteekwa kugira okwikiriza kwawe kugira ngu ojunwe. Tikwo kiri? ["Amiina."] N'okwawe. Tindikufayo n'obu waakuhurira amashomo marungi maangi munonga okwingana ki, n'obu waakuba memba w'amakanisa marungi maangi munonga okwingana ki. N'okwikiriza kwawe okurikukujuna. N'obu waakurira nooteera orwari ota, n'obu waakweshengyereza ota, n'obu waakuborooga ota, n'obu waakuzinira omu Mwoyo ota; okwikiriza kwawe kwonka nikwo kurikukujuna. Tikwo kiri? ["Amiina."] Ogewo nigwo muringo gwonka ogu orikukiriramu.

83 Ruhanga ku aheereza omuntu obutumwa, omubuurizi; omubuurizi abuurira okujunwa kandi aha obutumwa, oreeba obwo butumwa ku n'Amazima, Ruhanga abuhamya n'Ekigambo Kye, ago ku n'Amazima. Mbwenu mushemereire kwikiriza munonga okukiraho ekiconco ky'okutamba, obu kihamiibwe Ekigambo hamwe na Maraika. Mwine obumanyiso bubiri oburikworeka okutaremwa kwabwo bwombi, ka mushemeire kwikiriza,

munonga! Mwareeba? Kandi kasita . . .

Olkworeka ku kwabaire kutari kukunda kwa Ruhanga okuhikiriire kukora ekyo, akamanyiso obutoosha kakaba kaamara amaani. Ni bangahi abarikumanya ekyo? [Abateeraine baagira bati, "Amiina." -Omur.] Mubuuze omukazi wanye ori enyima aho. Naabaasa kubagambira. Ogwo . . . Niwe orikuteganisibwa kubi munonga. Kandi buri muntu naateekwa kungumisiririza. Haihi otarikumanya ah'ori, noogyendagyenda aho, kandi-kandi eki, kiri. Torikumanya. Ogyenda, oshuuma omu ruguuto kakyeho, oyemerera.

84 Hati, ndikuruga omu nteerane ezi ezihererukire. Nkakwata abantu abo abari omu runyiriri. Okubanza, tukaba tugiraho ebiro biri, bishatu, tutagabire zaakaada z'ab'okushabirwa. Reero twatunga abantu baingi, kyawetaagisa kugaba zaakaada z'ab'okushabirwa. Nkaba nyemerera, obumwe, nshabira makumi ataano nari makumi mushanju na bataano. Obundi ngiraho abantu b'okwehanuuza ahari Ruhanga nka makumi ana nari makumi ataano, omurundi gumwe, buri nyekiro. Nikwo kiri, Gene, Leo, naimwe abatwire haihi n'aha, abaabaire baza omu nteerane ezo? [Ab'eishe-emwe baagira bati, "Nikwo kiri." -Omur.] Buzima n'amazima! Kwonka kikakora ki? Ku Yaarugireho, nabo baataaha, naayebwa ahu naaba ndi; naayenda kumanya ahu naabaire naaruga, ndi omu ruguuto rugbyendwa.

Reero nooyenda kungambira, ngu Ruhanga ekyo naakikorera omuntu? Ngaaha, sebo. N'omuntu owaabaire naakyekorera wenka, naagyenda n'ekyapa ky'endagiiriro omu mwanya gw'obutumwa. Nkeemerera ahansi y'omuti mukye ogukuzire aho, aha rubaju rw'omuhanda, okwo omuri Washington, nari eruguru okwo. Naagira nti, "Mukama, kuri Noonyikiriza nkashuba nkagira obwengye, nkagaruka nkaba kurungi, okaanyamba nkamanya amazima, kugira ngu nttereere n'abantu ahonaaho, kandi ntereeze obuheereza."

85 Nkiine hati. Nshutami ahaifo hanu aha rubaju rw'omushozi, gwa Kentucky, ekiro kiri, nk'omu buturuturu akasheeshe kamwe, Akakinshuururira. Mbwenu nikyo eki. Nikyo eki. Hati ningyenda omu Iziina rya Mukama Yesu. Ahaa.

Mukiikirize, mugire amagara. Mukiikirize, mutambirwe. Tihariho n'omwe ou ndikubaasa kutuma yaakiikiriza. Nooteekwa kukiikiriza, iwe wenka. Kwonka naabagambira Amazima. Ruhanga akihamize ku n'Amazima, kurabira omu Kigambo Kye, na Maraika We, kurabira omu bumanyiso n'ebi'okutangaaza, okumara emyaka miraingwa ikumi na ibiri. Ku baraabe batarikwenda kukiikiriza hati, tibarikiikiriza na kakye. Ekyo tikwo kiri? [Abateeraine baagira bati, "Amiina." -Omur.] Kwonka obunaku buhikire, obu nduhire kuguma ahari oru rushozi. Niinyenda ngu nyinamukye mpikye Yorudani. Niinyenda ngu ntaahe omu kuraganisibwa okwo okwijwire. Niinyenda ngu ngire okwikiriza omuriinye, kutari kureeba akamanyiso, kutari kureeba ekintu eki Ruhanga ashuurwire, ekyapa ky'endagiiriro ky'omuringo gwona. Niinyenda amaisho gangye kugahanga ahari Gologosa, ngire nti, "Naija abaw'okwikiriza, Ai Mukama Ruhanga. Niinyija omu Iziina rya Mukama Yesu."

86 Hati hanu hariho bamwe abarikwenda kushabirwa, akasheeshe aka. Naija kubugana egyo ndwara n'obusaasi ebiri omu mubiri gwawe, omu Iziina rya Yesu Kristo. Ekyo ninza kukikora okuhitsya obu Ruhanga ariinyiha omu magara g'ensi egi. Kihikire. Kasita Ampa obwengye n'okwetegyereza, niinyija kushaba. Otaremwa, aha ky'orikwikiriza, kugira ngu naakushabira, obaase kukira. Ekyo okihamye. Ku oraabe otarikukiikiriza, obwo otasiiba noija, 'habw'okuba nooza kwekora kubi kwonka.

Hati kiri aha rutambi rw'amaraka, kandi kiri hanu. Okuruga hati, tihakiraho kukozesa ekiconco ky'okumanya ebiri omu mitima y'abantu okuhitsya obu Ruhanga arampe e . . . arangambire kukora ekintu nanka. Yaagira ati, "Irooko, ogambire omuntu ogu ekintu nanka," obwo ninza kugyenda mbagambire. Yaagira ati, "Kora ekintu nanka," ninza kugyenda nkikore.

Kwonka okufa kwemerera aho, nkagira nti, "Hati ndeeba. Ikiriza n'omutima gwave gwona. Eego. Ogu, eki n'eki. Ori Yohaana Doe, orugire oku n'oku. Oine ekookoro, ndaingwa eti. Dokita Nanka na nanka akakugambira ngu torikuza kukira. Okagyenda haagira eki waakora. Hati ekyo nooteekwa kukigarurayo, kandi eki okyeteise. Kandi obanke okore eki, obone kukira. Kare. Ow'eishe-emwe Doe, hati gumizamu, nookiikiriza. Hati, ori Ow'eishe-emwe kazi Nanka na nanka. Nooruga oku n'oku. Nooruga oku n'oku." Bwanyima ngira akazengyerera, ntarikumanya eky'okukora, haihi. Reero eky'okubanza, noomanya, hanu hajaho ondijo. Ndanzya, reero ndeeba ou ndikuranzya. Bwanyima nduga omu ruteerane, reero nyebuuza nti, "Ndi nkahi?" Ebyo tinkibigarukira.

87 Niinyija omu Iziina rya Mukama Yesu, nk'omuheereza We. Ruhanga ku araabe atakakibahamiize okuhitsya na hati, ku mbagambiire Amazima, obwo timuriikiriza ku mbagambiire Amazima na kakye. Amiina. Ekyo kihikire. N'amazima. Ni bangahi abarikwenda kushabirwa, yereeza omukono gwawe. Kare.

Hati niinyenda Teddy. Teddy akiri omu kyombeko? [Omuntu omwe yaagira ati, "Ngaaha. Kyawetaagisa kugyenda." -Omur.] Kyawetaagisa kugyenda. Omuteezi wa piyano hanu n'oha, orikubaasa kunteerera ekyeshongoro ahari piyano ekirikugira ngu, Ikiriza Kwonka, ku oraabe noobaasa? Ku haraabe hariho omuntu hanu orikubaasa kuteera ekyeshongoro ahari piyano. Mukiine? Nari, mwine orutambi rw'amaraka, murwine? Ku haraabe hariho omuntu weena hanu orikwenda kututeerera ekyeshongoro ahari piyano ekirikugira ngu, "Ikiriza Kwonka, omuteezi wa piyano, ija omumaisho. Omushaija nari omukazi, tikiine nshonga. Nitushemerera kuba naiwe. Ni kirungi. Obwo oriyo noogiteera mpora mpora hati, ku oraabe noobaasa, ow'eishe-emwe kazi, omukundwa.

88 Hati titurikuza kugaba zaakaada z'ab'okushabirwa. Twaba turi omu nteerane nkye nk'oru, titurikuzeetenga. Twaba turi omu nteerane mpango, obwo nituteekwa kugaba zaakaada, ku ndaashabire magana ataano. Nabwo kikaakwetaagisa kuzigaba, ahabw'okuba nootunga baingi munonga omu . . . bari omu mutwe gw'abantu, nooreeba.

Ni bangahi abarikwikiriza ngu oku n'okukunda kwa Ruhanga? [Abateeraine baagira bat, "Amiina." -Omur.] Oo, haine Ekyatuma naayehuriram u ngu naakora ekihikire. Haine Ekirikutuma . . . Kyanduga omu kifuba. Kitwiremu okumara emyaka ikumi na ibiri, ndikumanya ku hariho ekishobire, Ow'eishe-emwe Lee. Hati nimmanya ngu kyarugaho. Naakigamba. Kyakwatwa aha rutambi rw'amarakka. Hati kyandugaho.

89 Ijuka, noobaasa kujunwa ahabw'okwikiriza kwawe kwonka. Noobaasa kukira ahabw'okwikiriza kwawe kwonka. Nimwikiriza eki ku ni Baiburi? [Abateeraine baagira bat, "Amiina." -Omur.] Ekigambo kya Ruhanga. Noikiriza omuriisa waawe ku n'omushaija wa Ruhanga, ekanisa yoona ei oshabiramu? Ku oraabe otarikumwikiriza, oshemereire kugirugamu. Za aha mushaija ori omushaija wa Ruhanga. Reero ku oraamwikirize, oikirize ngu naakugambira Amazima, kandi Ogaakiire. Okwikiriza kwawe omuri Kristo nikwo kurikukujuna. N'obu omuriisa waawe yaakuba ari murungi ata; n'obu nyoko yaakuba naatiina Ruhanga munonga ata, ari orikwera ata; n'obu-n'obu Ekigambo kya Ruhanga kyakuba kiri kyo okwingana ki; n'obu waakutaka ota; n'obu waakushaba ota. Okwikiriza kwawe nikwo kurikukujuna. Okwikiriza nikwo kwakujunire.

Hati ekintu nikyo kimwe ekyo nikikora. N'obu . . . Ekigambo kya Ruhanga kikagira ngu eki Aryakyohereza omu biro by'aha muheru. Amashomo abiri agakurataine hati, ndeetsire Israeli y'omubiri hamwe na Israeli y'omwoyo, zombi hamwe. Nitusherura Joshua w'ebiro ebi, kandi niwe Omwoyo Orikwera, okutwebembera akatuhitsya omuri egoy Nsi. Naateekwa kugamba naarabira omu muntu, ahabw'okuba We n'Omwoyo. Naabagambira ebi Angambiire. Hati mwikirize, mukire.

90 Hati reka aba, ab'aha rubaju oru rw'orunyiriri. Doc, shuumayo. Billy Paulo, Billy arahi? Ija kunu oyambe, Doc, ku oraabe noobaasa.

Mbwenu hati buri omwe orikuraba omuri oru runyiriri rw'ab'okushabirwa, oijukye, nikiza kukugarukira buzima, ku oraabe otaikiriize n'omutima gwave gwona. N'Amazima. Nooteekwa Kukiikiriza. Hati oijukye, niwe orwaire. Ruhanga Akakigamba omuri Baiburi Ye. Ruhanga Yaakyohereza kurabira omu ntumwa Ye. Ruhanga Yaakihama na Maraika We. N'ahabw'ekyo hati nooteekwa Kukiikiriza.

Hati imwe abarikwenda kushabirwa, nkiki hanu eki Baiburi erikugamba. "Ku barita engaro aha barwaire, baryakira." Kandi ago n'Amazima. Kandi nitwenda kwikiriza ekyo, n'omutima gwaitu gwona, hati, reero Ruhanga abakize.

91 Hati mwetooroore mwije orubaju oru, murabire kimwe hanu, n'okugarukayo. Haije ab'orubaju oru, bwanyima ab'orubaju oru orundi. Mugarukyeyo omu muhanda nigwo gumwe. Reka ruri rubaju rwemerere aha rubaju rw'omukono gwa buryo, enyima hanu. Kare. Noogamba ki? [Haagira owaagamba n'ow'eishe-emwe Branham -Omur.] Naaza kwizira kimwe ahaifo hanu. Eego, sebo. Ahaifo hanu honyini, kubashabira.

Hati, aga mabaruha n'ebitambaara, naabishabiire. Baingi omuriimwe, bamwe omuriimwe, obundi, nimuteekwa kugyenda. Muteebwa ekiro eki, hati, saaviisi eri aha kuhamya, Ruhanga Okuhamya Ekanisa Y'Amazima. Mwareeba?

92 Hati, ahariimwe abari . . . kuza kushabirwa, nimwikiriza kimwe ngu nimuza kukira? [abantu abari omu runyiriri rw'ab'okushabirwa baagira bat, "Eego." -Omur.] Ku oraabe otarikwikiriza, otaija. Ku oraabe noikiriza, n'obujunaanizibwa bwawe kwija.

Hati, tindi mutambi, kwonka nyine ekiconco ky'okutamba. Ekyo kikahamibwa. Kihamiibwe ku n'amazima. Mwareeba? Kare munonga, obwire buraingwa obuhingwire, niinyijuka, nkaba nza aha irwariro hanu. Nkaba ndi omubuurizi w'Ababaputisiti hanu, omu kyanga eki. Nkaba nza aha irwariro. Hakaba hariyo omunaasi okuzire okwo. Akaba naatura eifo omuri Howard Park. Tindikumanya yaaba akiryo na hati, nari atakiryo, aha irwariro. Akaba akira kugambira omurwaire ati, "Hati nooza kukira. Hati nooza kukira." Ati, "Oriya mubuurizi mukye w'Omubapurisiti yaaza kwija akushabire." Mwareeba? Kikaba kiri . . . Kikaba nikitandika. Nikwo. Okwo nikwo kyabaire kiri. Kandi hati kikaba nikiza kujanjaara, kuruga omuri ogu mwanya hanu, kikabuga ensi yoona.

93 Kandi hati Akampa obumanyiso obu, kunshumbuusha obwegyese bwangye. Hati kuri nyine obwegyese nk'obwa bamwe omuri aba baheereza abandi, eky'okureeberaho, omwe ou ndikumanya, obundi shana Ow'eishe-emwe Neville nari Dokita Vayle, bamwe ahari abo, ti-tikikaanyetaagiise kugira eki. Kwonka ninteeekwa kukigira, kushumbuusha eki, kuza omu mwanya gw'eki ntaratungire omu muringo gw'obwegyese. Kikaanyetaagisa kugira obumanyiso. Kandi nk'oku . . . Obumanyiso bukozire nk'oku obwegyese bwakukozire. Kwonka, nooreeba, waaba otaine ebirikukubaasiisa, Ruhanga naabaasa kukuha eby'okukubaasiisa, omu gundi muringo.

Hati mugire okwikiriza kandi mwikirize. Hati niinyenda ngu buri omwe araganise Ruhanga, ahu mwemereire. Ahabw'okuba, ku oraabe otakikozire, tikiraakuyambe. Niinyenda ngu buri omwe ajuure okubanganisa kwona. Kandi waija okaraba omu runyiriri, hazu nkakushabira, niinyenda ngu oshohore orugye hanu. Noobaasa kutareeba akabonero koona k'okukira. Kwonka, ekyo, Yesu taragizire ati, "Nookireeba? Nookyehuriram?" Akagira ati, "Nookiikiriza? Nookiikiriza? Ku oraabe noikiriza."

94 Hati, nyetegyereize eki, omu rugyendo oru. Nshabira abantu. Bamwe omuribo Akaba atakaabaasa; abu Yaakoreireho okwo kureeba ebiri omu mitima yaabo; bakaba bagyenda, nibagira bati, "Ha! Tihariho eki ntungire. Tangambiire ekintu kyona." Ogwo muntu emirundi mingi tihariho eki yaabaire atunga, nawe.

Kwonka bamwe omuribo baija omu runyiriri, nibagira bati, "Yebare, Mukama. Ninkikiriza." Nibo abu naabaire mpurira nibagira bati, "Noomanya, Ow'eishe-emwe Branham, tindahuriire entaaniso yoona, okumara ebiro bingi," obundi nka saabiiti ibiri nari ishatu, nari ezirengireho. "Kwonka, ahonaaho, nkataandika kuhurira ekintu ekyo nikindugaho. Waareeba? Ekyo, nikwo kyagyenzire." Mwareeba? Mwareeba? Mwareeba?

Noobaasa kugira ngu noikiriza. Hariho ebibiina bishatu by'abantu abaza omu ruteerane, abo ni: abatarikwikiriza,abeeyeta abaikiriza, n'abaikiriza. Bamwe omuribo nibareebeka nk'abarikwikiriza, "Oo, eego, niinyikiriza," kwonka tibarikwikiriza. Ku oraabe Nookiikiriza . . .

Niinyenda kukubuuza eki kibuuzo hati. Ku oraabe nookiikiriza, nooteekwa kukira. Hurikiza. Ekyo ka nkigarukyemu. Nooteekwa kukira n'obu haakubaho ki, ku oraabe nookiikiriza.

95 Eky'okubanza, Ekigambo kya Ruhanga . . . ? . . . kikatuma. Ekyo nimukiikiriza? [Abateeraine baagira bati, "Amiina." -Omur.] Ekigambo kya Ruhanga nikwo kyagambire, okubanza. Ekyo nikikira byona. Ekintu kya kabiri, Maraika wa Mukama akihamize, obumanyiso bwakyoreka. Ekyo tikwo kiri? ["Amiina."] Hati, tihariho kuremwa kwona, nangwa na busha.

Tihariho kuremwa kwona omu Kigambo kya Ruhanga, okurikugira kuti, "Rimwe Nka-Nkabaha okutambirwa, kwonka hati Naakubaaka." Ekyo niinyenda ngu omuntu akiinyorekye. Ninkworeka ahu Yesu yaaragiire Ekanisa Ye kushabira abarwaire, kandi okushaba okurimu okwikiriza kuryakiza ogwo orwaire. Hati naiwe ngambira ahu Yaagambire ngu tikirigaruka kubaho bundi. Nyoreka omuri Baiburi. Mwareeba?

Akagira ngu, omu biro by'aha muheru Aryakora ebintu ebi ebiriho, aimutsye ebintu ebi. Reeba ebibaireho. Arinzire Ekigambo Kye. Naabagambira ku Yantumire, hati ensi neekimanya. Sayansa neekimanya. Maraika wa Mukama naakihamya. Kandi n'ebyana nibyoreka ku n'amazima.

96 Tutwire omu nsi erwaire. Ni baingi ab'okushabira. Nkateekateeka nti, "Buzima hashemereire kuba hariho obundi buryo, oihireho obu."

Ow'eishe-emwe Moore rimwe akangambira ati, "Hariho akaishiki kato enshoberwa akaashotooka kaahika omu kyombeko, karemaire." Omwishiki muto enshoberwa naagyezaho kuhika ahu naabaire ndi. Naaranzya eifo. Ogwo mwana yaatandika kurira. Mpaho, tibarabaasize kumureeta omu runyiriri. Akaba ataine kaada y'ab'okushabirwa. Tindakimanyire, ekyo kikaba kiri ekiro ky'aha muheru ky'omwana ogwo. Ow'eishe-emwe Moore hamwe n'abandi baamuyamba kuruga omu runyiriri.

Ekiro ekyakuratsireho, tukashutama twakigaaniiraho. Yaagira ati, "Ow'eishe-emwe Branham, ekyo kikanshaasha."

Naagira nti, "Kikakushasha? Nooteekateeka ngu nyowe kikankora kita?" Mwareeba?

Akaishiki kato, karemaire! Ekyo kikangumamu. Kandi hahingwireho nk'emyaka ikumi ekyo kibaireho, akaishiki kato, karemaire okwo omuri Illinois. Omutwe mukye ogurikwiragura, amaisho ga burawuni, nikashotooka, muhinya nkye, nikagyezaho kuhika ahu naabaire ndi. Reero abahwezi eifo okwo baakayamba baakashutamisa enyima omu kagaari kaako. Kaashotooka kaaruga omu kagaari kaako, kugira ngu kahikye aharuguru aho. Ahabw'enki? Noobaasa kushabira abatarikukira aho obwingi. Kandi kuri naihiremu bamwe, nkakataasyamu kataine kaada y'ab'okushabirwa, abandi kikaabakozire kubi. Mwareeba? Nikwo. Nkaba ntarikubaasa kukikora. Nkagira nti, "Buzima hashemereire kuba hariho obundi buryo." Nangwa shi obwo bwire kuri naamanyire eki ndikumanya hati, ebintu bikaabaire bitari nk'oku biri, buzima bikaabaire bihindukireho.

97 Hati, buri omwe omuriimwe, ekintu kyonka ekiraabazibire kukira, niimwe okutakiikiriza.

Hati ka twinikye emitwe yaitu.

Tataitwe ow'omu Iguru, hanu heemereireho empumi, abarema, abarikubonabonesibwa, abarwaire, abarikuwa, abarikwitwa ekookoro, ebironda by'omu kishansha, ebizimba ebitarimu mahira. Boona beemereire hanu omu runyiriri, Mukama. Naabuurira Ekigambo. Kandi okumara emyaka ikumi na ibiri, Ekyo Okihamize omu nsi yoona. Naashaba okusaasirwa, kandi nimmanya ngu tindakikozire nkana. Nkakikora ahabw'okuba nkateekateeka ngu nkaba ninkikora omu buryo obuhikire. Hati naija, Mukama, naija Ahariiwe, n'obucureezi. Ninkushaba kuha omugisha okushaba kwangye, ngu, ku ndaashabire abantu aba, buri omwe akire. Ha omugisha okwikiriza kwabo. Tukize obutaikiriza bwaitu, Mukama.

Kandi ka buri omwe, akasheeshe aka, atungye okworekwa buzima. Ninshaba ngu hatagira na kumwe oku baafeerwa. Kureka ninshaba ngu bakwetegyereze, omu Byahandiikirwe, kandi bateekateekye ahari Maraika wa Mukama enyima okwo omu kutandika, obu yaagira ati, "Nk'oku Musa yaahairwe ebiconco biri." Kandi, emyaka ebiri ehangwire, akareeta Baiburi, n'Omukono nigushuma, nk'ogwo ogwahandiikire aha kisiika omuri Babulooni; omukono gw'omuntu, orikushusha oti, gukabiikuura Baiburi, gwahika aha shuura egi yonyini, "Nk'oku Naabaire

ndi Musa, nikwo Ndigunga naiwe." Kandi, Taata, nkiki hanu akasheeshe aka, kyamanywa. Nitukusiima ahawb'eki, Mukama. Onsaasire enhobe yangye.

Kandi hati twaba nitutaaha omuri oru ruteerane rw'okushaba, ninshaba ngu Amaani ga Ruhanga gakize buri murwaire oraije omu runyiriri oru. Naagyenda nk'omuhereza Waawe, ntarikushaba okushukwaho kw'omutaano kwona, ekintu kyona eky'omutaano. Kureka nimmanya eki, ngu omu magara gangye harimu obwo buheereza, naaza kubukoresa, omu Iziina rya Yesu Kristo.

98 Hati, Ow'eishe-emwe Neville, yemerera aha. Hati, n'ekiconco eki, tindikuza kubasiiga amajuta. Mwareeba? Naaza kukora eki Yangambiire kukora kyonka. Okutumwa kwangye nikugira kuti, "Hitsya abantu aha kukwikiriza. Otabanganisa." Nimwikiriza? [Abateeraine baagira bat, "Amiina." -Omur.] Kandi tindikubanganisa. Nihateekwa kugira ekyabaho.

Ow'eishe-emwe Neville yaaza kwebembera ebyeshongoro. Mwena mushabe, mpora, obwo ndiyo ninshabira abarwaire. [Omwanya oguriho busha aha rutambi rw'amaraka. Ow'eishe-emwe Neville yaatandika kweshongora Ikiriza Kwonka -Omur.]

99 Mukama Yesu, ninta engaro zangye aha mukazi ogu orwaire entsigo. Kandi ninzikabukira, omu Iziina rya Yesu Kristo. K'agyende akire.

N'enki ekyabaho? Endwara yaawe?

Mukama, ninta engaro zangye aha w'eishe-emwe, egi ndwara y'akaturugunu akeezingiriire ahaifo y'oruhago. Kandi ninkabukira aga maani ga Sitaane, omu Iziina rya Yesu Kristo. Amiina.

Nooteekwa kukira.

Mukama, ninta engaro zangye aha w'eishe-emwekazi mugyenzi wangye oine aga maguru mabi agazimbire. Ninkabukira okuzimba oku, omu Iziina rya Yesu Kristo. Amiina.

Irooko, okiikirize, Ow'eishe-emwekazi . . . ? . . . , kandi nooza kukireeba.

Mukama! Orwaire omutima n'ezindi ndwara. Ninta engaro zangye aha w'eishe-emwekazi mugyenzi wangye ogu, kandi ninzikabukira, omu Iziina rya Yesu, nyegamiire aha kutumwa kwangye.

Mukama, atandikire kuhuma kandi aine n'endwara y'omutima. Nimbikabukira, ahawb'omukazi ogu, nyegamiire okutumwa kwangye oku Ruhanga yantumire. Omu Iziina rya Yesu. Amiina.

Nikiteekwa kubaho. Niziza kukira, Ow'eishe-emwekazi . . . ? . . . Ninkiikiriza n'omutima gwangye gwona.

100 [Omwanya oguriho busha aha rutambi rw'amaraka -Omur.] Ago n'amazima. Ku burabe buri obwire bwawe bw'okugyenda, nooteekwa kugyenda omu muringo nanka. Ekyo kihikire. Kwonka, okubanza, Atakakugambiire, ku oraabe omwesigwa kandi otakibanganise, nookira. Ekyo buzima kihikire.

Laazaaro akazooka omu bafu. Yaagaruka yaafa. Kwonka akazooka omu bafu, okworeka ngu Ruhanga ahikiiriza eki Arikuba araganiise abantu. Akagira ati, "Mariamu, noikiriza ekyo? Niinye kuzooka n'Amagara. Ntumirwe Ruhanga, kuzoora abafu. Noikiriza ekyo?"

Yaagira ati, "Eego, Mukama. Niinyikiriza ku Ori Omwana wa Ruhanga, otuura ari ow'okwija omu nsi."

Yaabuuza ati, "Mumuziikire hi?" Mwareeba?

Akagaruka yaafa. Kwonka Akamuzoora, okworeka ku Yaabaire ari okuzooka n'Amagara. Mwareeba?

Ruhanga akora ebintu ebyo, kandi buri kintu kiri omu buteeka bwa Ruhanga. Oo, naashemererwa munonga kugamba ekyo. Buri kintu kiri gye munonga omu buteeka. Kuri nimwikiriza, kyona eki muraashabe nimukiheebwa. Nikiteekwa kubakwo. Kare.

101 Hati mugumizemu nimushaba, obwo turiyo nitumaririza abari omu runyiriri.

Ruhanga abahe omugisha.

Mukama Yesu, ow'eishe-emwekazi mugyenzi waitu arwaire munonga, yampurira nyemereire hanu, nimbuurira Ekigambo. Ni-ninshaba ngu obu bweremwa bukye bw'okubanganisa bubarugyemu boona, Mukama. Ka baimukye, barugye ahari oru rushozi orwa ira rw'okugyenda nibeetooroora oku n'oku; bagumizemu bahikye Yorudani, Mukama. Kibakorere, Mukama. K'ow'eishe-emwekazi mugyenzi waitu agyende orugyendo oru hati, okuruga eshaaha egi n'okugumizamu, naikiriza ngu Ruhanga yaatambira omubiri gwe. Omu Iziina rya Yesu. Gyenda, noikiriza.

Ruhanga akuhe omugisha.

Mukama Yesu, ha omukazi ogu eki omutima gwe gurikwetenga, ahawba muhara we hamwe n'eka ye.

Ninshaba, ngu, omu Iziina rya Yesu, eki akitungye; obwo ndikuhayo okushaba kwangye, kandi ahabw'okwikiriza, nimutaho engaro. Kuri Ntarikukwikiriza, tinkaamutaireho engaro zangye. Kuri nimmanya ngu Torikuza kukikora, tinkaamushabiire. Kwonka niinyikiriza, Mukama. Kandi, nawe naikiriza. Mbwenu nituta okwikiriza kwaitu hamwe, nitwikiriza! . . . ? . . . Amiina.

102 [Ow'eishe-emwe omwe yaagamba n'Ow'eishe-emwe Branham -Omur.]

Ai Ruhanga, ha omugisha omushaija ogu. Mukama, ahabw'abaana be abakundwa abu arikwenda ngu bajunwe. Naagumirwa okuhurira. Dokita naagira ngu endwara erikuhumya amaisho emukwatsire. Naayenda ngu abeho ahaise Ruhanga ekitiinisa. Kimukorere, Mukama, obwo ndiyo ninshaba okushaba oku ahabw'ow'eishe-emwe mugyenzi wangye. Kandi naaza kikitunga, omu Iziina rya Yesu. Amiina.

Oheebwe omugisha, ow'eishe-emwe. Otabanganisa. Ikiriza ekyo eki waashaba.

[Ow'eishe-emwekazi yaagamba n'Ow'eishe-emwe Branham -Omur.] Akuhe omugisha, ow'eishe-emwekazi!

Mukama, ogu mukazi mukye enshoberwa oyemereire hanu ahabwa . . . ? . . . Haine ekiriho, Mukama, ekirikumushasha. Nibaza kumwihaho oruhu rw'omubiri bagute ahandi ahasiisikaire. Nyina naashabira omubiri gwe n'okujunwa. Naashabira nkunzi ye. Naashabira embeera ye y'okwekanga, Mukama. Ari haihi kutentebuka. Ai Ruhanga, ninshaba ngu Omuhe eki omutima gwe gurikwetenga. Mutambire endwara ze, kandi omukize. Omu Iziina rya Yesu, nimushabira okushaba oku okurimu okwikiriza. Amiina.

Ruhanga akuhe omugisha, ow'eishe-emwekazi. Irooko ogyende, omu Iziina rya Mukama. Ruhanga akuhe omugisha.

103 Mukama, ahabw'okujunwa kwa nkuzi ye. Ninshaba ngu omuhe eki arikushaba, omu Iziina rya Yesu. Amiina.

Ikiriza hati, ow'eishe-emwekazi, ngu ekyo waakiheebwa, kandi nikiba ekyawe. Ku oraakiikirize, nikiteekwa kubakwo.

Ahabw'Ow'eishe-emwe mugyenzi waitu Ted Dudley. Ori ota? Oheebwe omugisha. Ni kirungi! Okurugira kimwe Phoenix, Arizona. Ebiso okwo nihootsya?

Ogwo mukazi, hanu, akakirira omu ruteerane rwangye. Akaba naaruga hi? Nooruga Phoenix, mukazi 'we? Torikuruga . . . Okaba ori Phoenix, ahabw'oruteerane.

Nooyenda ngu Akukorere ki, Ted? [Ow'eishe-emwe yaagira ati, "Ankize obuhiima." -Omur.] Akukize obuhiima. Ruhanga akuhe omugisha! . . . ? . . .

Ruhanga omukundwa, nk'oku ow'eishe-emwe ogu omukundwa . . . ? . . . n'ahabw'enshonga y'abantu abaine oburemeezi. Ninshaba ngu Omukize. Yaarugira kimwe Phoenix, Arizona, kushabirwa, kwemerera omuri oru runyiriri, kuhurira Obutumwa, kugarurwamu amaani. Mukama, nooshusha oti n'okwehayo kw'amaani. Nikwo.

Kwonka omugabekazi w'eihanga rya Bukiizi-bwa-buryo akaija, yaamara ameezi ashatu, naagyendera aha mugongo gw'engamira, naaraba omu ihamba ry'omusheenyi erya Sahara, kuhurira obwengye bwa Sulemaani. Kandi reeba, orikukira Sulemaani ari aha; Omwoyo Orikwera ari aha, orikukira Sulemaani.

Mukama, ninshaba ngu Omutambire obusaasi bw'omu mubiri gwe. Muhe ekyetengo ky'omutima gwe. Omugyendeseze omu muhanda ogwamuteereirweho. Ninshaba ngu oburungi bwa Ruhanga bube ahariwe. Omugisha ogu ningushabira ow'eishe-emwe mugyenzi wangye, omu Iziina rya Yesu Kristo, Omwana wa Ruhanga. Amiina.

Ted, waaba noogarukayo, ogyende nagwo. N'ogwawe. Naagukuha. Irooko oguheebwe.

104 Ow'eishe-emwe George, haihi buri omwe naamanya George Wright. Ni bangahi abarikwijuka ekyabaireho ekyo, obu yaabaire arikufa enshumi nkye ehwiring? Baadokita boona bakamurabaho. Kandi omubiri gwe gukaba guzimbire nka batyo, ekishegyeshu kiri omu mutima gwe. Baadokita baingi bakaba baamuhweire amatsiko. Naaza kumushabira. Ow'eishe-emwe Funk yaaba ari hanu akaanya kakye akaahingura; ningira ngu akaba ari naanye, eifo okwo obwire obwo. Naashutama aha mutwe gw'ekibungo eifo okwo, naatwaza nk'owaabaire naaza kuhiiga.

Niinyenda kugambira ekanisa egi hati, nintekwa kugamba ebintu bimwe ebitwire nibigyenda omu maisho. Emirundi mingi muteekateeka ngu ngiire kuhiiga; nimba ntogiire kuhiiga. Orwo n'orwekwatso kuzibira abantu kunkuratira. Nintekwa kuzayo kugira ngu nyehereere na Ruhanga. Nimba ntogiire eifo, kuhiiga, banywani. Eego, nimpiga, kwonka ti-ti kuhiiga kw'ogwo muringo! . . . ? . . .

Nkashutama aha mutwe gw'ekibungo. Naatwaza, ahariwe, nk'owaabaire naaza kuhiiga wakame. Naagyendera kimwe naayehinguririza, enyima y'enju, reero naayereeza emikono yangye ngyorekyereize enju, naashaba naashaba. Arikufa!

Omwoyo Orikwera akangambira, ekiro kimwe. Omwe ahari aba bashaija, naashabira omu kanisa yangye, abatarikwikiriza ngu okutamba kuhikire.

Omuhereza omwe akaza omu ka ye, enshumi nkye ehweire, kandi yaagyezaho kumpakanisizayo nanteeza empaka. Abantu baangi omuriimwe abari aha, mukaba muriyo ekyo. Nimureeba aho, ogwo mushaija akaba ari haihi kugwa eiraro. Mbwenu hati naagyezaho kunsherura, kutunga Omwoyo Orikwera. [Ow'eishe-emwe Wright yaagira ati, "Eki orikugamba, ahari munywani wangye w'aha mara akiine, nabwo, ow'eishe-emwe." -Omur.] Ekyo kiteekateekyeho.

105 Omushaija owaayemereire aho kuhakana, akagira ati, "Eky'okubanza, niinyenda kukugambira, ori owa Sitaane."

Naagira nti, "Naakusaasira, 'habw'okuba eki orikugambaho torikukimanya."

Reero bwanyima yaahinduka yaagira ati, "Nimmania ngu oine Omwoyo wa Kristo."

Naagira nti, "Naaba ndi 'daimoni,' edakiika nkye ezaarabaho, mbwenu hati ndi 'Kristo.' Ni kiiha? Waareeba?" Mwareeba? N'ahabw'ekyo hati, bo, ebintu ebirikutiinisa bibaireho.

Ogu mushaija arambiire aho, naafa. Reero omushaija ogu yaamushekyerera, yaagira ati, "Kyo irooko hati oyete Omutambi waawe."

Nkaba ndi eruguru omuri Lexington, Kentucky, ahu omukazi yaatambiirwe ekookoro. Reero omu kworekwa, Mukama yaanyoreka, ningaruka, omuri ako kasheeshe nka shaaha ikumi n'emwe. Ekyo Akakiinyoreka. Yaagira ati, "Nooza kukuwata omu ngaro z'Ow'eishe-emwe George Wright, arikwija naaraba omu kanisa, kandi naaza kwija hanu akukwate omu ngaro. Kandi omushaija owaamushekyereire, George Wright naija kurima ekituuro kye." Nkaba ntarikukimanya, nkaba ntarikumanya ku yaabaire naarima ebituuro.

106 Nkateerera Ow'eishe-emwekazi Wright esimu. Naateekwa kuba haine ah'ari hanu. Eego. Naateerera esimu Ow'eishe-emwekazi Wright. Naagira nti, "Nyine OKU NIKWO MUKAMA ARIKUGIRA." Nikwo. Okwo nikwo kworekwa oku ndikwenda ngu ndeebe okuruga hati n'okugumizamu. Ku ndaagire eki naagambira omuntu, kihikiirire. Naagira nti, "Ow'eishe-emwe George naija kurima ekituuro ky'ogwo mushaija, nari naija kuba aha kituuro ky'ogwo mushaija orikumushekyerera. Kandi naaza kwija omu kanisa, kandi ninza kumukwata omu ngaro." Ow'eishe-emwe George yaakira ekyo kishegyeshu.

Reero nk'okwezi kumwe nari ameezi abiri, ahanyima y'ekyo, naagarukayo. Kandi obwire bwona, haihi obwire bwona, akaba areetwa orubaju oru. Kwonka, akasheeshe ako, akareetwa orubaju oru. Abantu nkaba . . . Naagira nti, "Mureebe, mureebe, mureebe! Ngugu hanu yaija, aha honyini, mwareeba, buzimazima nk'oku Yaakigambre."

Ngugu hanu, eriizooba. Ekyo kimazire . . . [Ow'eishe-emwe Wright yaagira ati, "Emyaka mwenda." -Omur.] Emyaka mwenda ehangwire. ["Nkaba nyine ebishegyeshu mwenda byarugaho."] Ebishegyeshu mwenda, emyaka mwenda ehangwire.

107 Ebyo bikiri aho, mpuriire ngu Ow'eishe-emwekazi Hickerson . . . Ow'eishe-emwe Hickerson ari aha eriizooba? Ngu ow'eishe-emwekazi ari gye. Ekyo ni kirungi. Abaire aine ebishegyeshu, nawe, bingi omu kuguru kwe.

Hati arwaire amahenengye omu mukono gwe.

Ogwo akaba ari muhara we, Ow'eishe-emwekazi Hattie oshutami aho aho, ou naaheza kugambaho obujurizi hanu hati, ou obuheereza busya bwakoreireho omurundi gw'okubanza. Ekyo kihikire, Ow'eishe-emwekazi Hattie. Niinyebuuza yaaba aboojo abo barimu akasheeshe aka? Bari hamwe naiwe? [Ow'eishe-emwekazi Hattie yaagira ati, "Bari enyima." -Omur.]

Aboojabu abo barahi? Mbabo bombi beemereire enyima kuriya aha muheru. Mbabo aho aboojo babiri abu nyinabo yaaheirwe . . . ? . . . Mwereeze emikono yaanyu ahaiguru, boojo 'mwe, nikwo babareebe. Kare. Beemereire enyima kuriya aha muheru. N'eky'okutangaaza, tikwo, Orville. Buzima n'eky'okutangaaza. Kare.

108 Ow'eishe-emwe George. [Ow'eishe-emwe Wright yaagira ati, "Noomanya, Ow'eishe-emwe Bill. Niinyikiriza." -Omur.] Nimmania ngu noikiriza. Kandi nimmania, emirundi mingi, nkaraara okwo omu kishengye kyawé, nyekiro, nindeebera omu dirisa, mpurikiize, kaanyonza ekuzire. Ekyo kimwe nituteekwa kwambuka, Ow'eishe-emwe George. Okuhitsya obwire obwo, Ruhanga agume naitwe. Nimmania ngu Naija kuguma naitwe obwo. "Yee, n'obu ndiraba omu ruhanga rw'ekibunda ky'okufa, tinditiina kabi koona. Ahabw'okuba ori hamwe naanye." Okworekwa okwo, hanu enshumi nkye ehangwire, ku naareebire abantu abo abakuzire baagarukire kuba bato ogundi murundi, okwo nikwo ndikureeba ekyo kimwe.

Tataitwe ow'omu Iguru, ha ow'eishe-emwe mugyenzi waitu eki omutima gwe gurikwetenga. Mukize egi ndwara y'amahenengye. Ariyo naaba omugurusi, Taata. Ninshaba ngu Omuyambe. Yamba Ow'eishe-emwekazi Wright, Edith omuto, hamwe n'egyo ka yoona eifo okwo. Ow'eishe-emwekazi Hattie, abaana be, abakundwa baabo boona, guma nabo, Taata. Garukamu eshaara egi, obwo ndiyo ningishaba omu Iziina rya Yesu. Amiina.

[Ow'eishe-emwe George Wright yaagira ati, "Ninza kuhitsya emyaka makumi mushanju na mwenda." -Omur.] Makumi mushanju na mwenda. Ruhanga akuhe omugisha, Ow'eishe-emwe Wright, akwongyere ebiro bingi munonga. Mukama asiimwe.

109 Ow'eishe-emwe Daulton. Mugyenzi, mugyenzi! Ngugu hanu ow'eishe-emwe otwire ari ow'omuhendo ahariinye. Naaza kubagambira ekyabaireho. Tiinyine bwire bw'okukirabamu. Omukazi we naamanya. Akagira ati, "Akaba arikufa." Okuteerwa omutima, nikyo, ow'eishe-emwekazi? Kwonka, enyimaho, Mukama akaba yaamuhaire ekirooto, kandi n'okushoboorora kwabaho. Reero ku yaateirwe omutima, omukazi we akeemerera butsimba omu maisho g'ekyabaho yaagira ati, "Eki naakyanga." Ruhanga akaba yaamuhaire ekirooto ekirikworeka ngu kikaba nikiza kuba kityo, kandi n'okushoboorora kwabaireho. Kwonka obwo dokita akaba naateekateeka ngu ogwo mushaija akaba ariyo naafa, mbwenu ngugu hanu ahuriire, eriizooba.

Mukama Yesu, ow'eishe-emwe omukundwa mugyenzi waitu, yaavuga kuruga hare munonga okwija omuri oru ruteerane akasheeshe aka. Enyugunu ye neeshaasha. Nk'emotoka, Mukama, ebicweka bimwe byatandika kukura, kuhwamu amaani. Kwonka, Ai Mukama, obe amaani ge. Niiwe maani gaitu. Gumya ogu mwanya oguremahaire omu nyugunu ye. Gumya buri kicweka ekitaine maani, Mukama. Kandi otambire ow'eishe-emwe omukundwa mugyenzi waitu, obwo ndiyo nimuha omugisha omu Izina rya Yesu Kristo, Omwana Waawe. Amiina.

Ruhanga akuhe omugisha, Ow'eishe-emwe Daulton. Nikwo kiraabe.

110 Kare, ow'eishe-emwekazi, Mukama akukorere ki? [Ow'eishe-emwekazi yaagamba n'Ow'eishe-emwe Branham - Omur.] Ahabw'enki, Ow'eishe-emwekazi Daugherty. Ogu ni Betty? ["Ogwo niinye."] Ahabw'enki, Betty, oheebwe omugisha!

N'oha omuri taabirinaakuru egi otarikumanya Betty Daugherty? Omurundi gw'okubanza obu obuheereza bwangye obwa ira bwakozire, bukakorera ahari ogu mwana. Ni bangahi abarikwijuka ekyo? Mwareeba? [Abateeraine baagira bat, "Amiina." -Omur.]

Betty akaba arwaire okusikuka. Kandi akaba ari omu mbeera mbi munonga, okuhitsya obu, nangwa yaabaire atarikutwaza nk'omuntu. Tihariho dokita n'omwe owaabaire naabaasa kugira eki yaamukorera.

Reero naaza St. Louis. Ekanisa egi ekahayo esente, reero naagira ou naatiiza ekooti. Banshorooreza doola ikumi n'emwe, kugira ngu nzeyo kushabira ogu mwishiki muto. Akaba ari omwishiki muto buzima, haihi nka-haihi nk'ogu mwishiki muto oshutami hanu hanu, omwana omwishiki muto. Reero naagumaho . . . Ow'eishe-emwe Daugherty ari hanu? Tariho. Reero naashaba naashaba; tinaabaasa kugira ahu naahika. Kwonka aha muheru, ku naabaire nshutami omu motoka y'Ow'eishe-emwe Daugherty, naareeba okworekwa eki bashemereire kukora.

Reero yaakuratira okwo kworekwa gye buzima nk'oku Ruhanga yaagambire ngu akore. Ningira ngu, ebiteekateeko byabo bikaba nibikihakanisa kakyeho, obwire obwo. Kwonka akakikora kwonyini nk'oku Mukama yaagambire ngu akikore, reero Betty yaakira. Omurundi gw'okubanza kumureeba, oku . . . Okworekwa kukagira kuti, "Ishenku Daugherty aze aha muheru gumwe gw'ekitanda; Ow'eishe-emwe Daugherty, aha gundi. Reero nyina akwate akatambaara anaabise obuso hamwe n'engaro, by'ogwo mwana n'ebindi." Obwo ndiyo ninshaba nti, "Tataitwe ow'omu Iguru, Eiziina Ryawe ryezbibe."

111 Mbwenu hati Betty arwaire endwara y'okuhuma. Nkamushabira e-enshumu nkye ehangwire, enyima y'ekyombeko, omuri Chatauqua.

Betty, mukundwa, hati eki ka tukishwijume n'obwegyendesereza buzima. Niinyenda kukwata omukono gwawe. Ohumiire, kimwe, Betty? [Betty Daugherty yaagira ati, "Ngaaha." -Omur.] Noobaasa kureeba akashana n'akairima kusha. Hati oine emyaka engahi, Betty? ["Makumi abiri n'ebiri."] Makumi abiri n'ebiri. Obwire obwo, akaba aine nk'emyaka mushanju nari munaana. Ow'eishe-emwekazi Daugherty, waahurira okukurura kw'amaani, tikwo? Noomanya, Betty, obutoosha nyikiriza ngu Ruhanga akwiniire eky'okukora. Nintekateeka ngu niyo nshonga etumire byakubaho biti. Kandi ni-niinyikiriza ngu omuzigu niwe akozire ekintu kibi eki.

Hati, Betty, eki, nookimanya. Kuri nyine obushoboorozi bw'okuhikamu nkakwata obwo burwaire oburikuhumya amaisho nkabwihamu, nkaakikozire. [Ow'eishe-emwekazi Betty Daugherty yaagira ati, "Eego." - Omur.] Timbwine.

Kwonka, Betty, eki naakugambiire omurundi gw'okubanza, nigo mazima; nk'oku ndi aha, nyowe naiwe, nk'ow'eishe-emwe n'ow'eishe-emwekazi omuri Kristo. Ow'eishe-emwe Daugherty, sho omukundwa, ow'eishe-emwe murungi ou ndagizire. Nyoko omukundwa ari hanu. Nkatuura omu nju yaanyu, kandi twarya hamwe eby'okurya byanyu, na-na buri kimwe. Otwire ori nk'oku-nk'oku waakubaire haihi nka munyaanyazi. N'ahabw'ekyo ndi omwesigwa ahariiwe nk'oku ndikubaasa kuba ahari Delores oshutami enyima kuriya.

112 Hati, Ruhanga akaraganisa eki, Betty. Byona niinyenda kubiihayo . . . Sho ahabw'okuba omuheereza, iwe ahabw'okukurira omu ka erikushabira abarwaire. Hatariho kubanganisa, orashabiirweho, emirundi mingi munonga. Kihikire ahu, omu buryo bumwe, orikukirabaho, oku n'oku. Ni-ni-nituba nk'abaabura omugasho gwakyo. Nooreeba eki ndikumanyisa? [Ow'eishe-emwekazi Betty Daugherty yaagira ati, "Amiina." -Omur.]

Mugyenzi, okuzire waaba omuhara murungi, oboneire, Betty. N'eky'enshoni kureeba amaisho gaawe nigaba gatyo. Meda akiri omu kyombeko? Omukazi wangye yaaba naayenda kukureeba. Agizire ati, "Niinyenda kureeba

Betty, oku akuzire akaba omuhara murungi." Betty, okaba ori omwishiki muto, murungi. Burijjo otuura ori omuhara murungi.

Hati, hariho ebintu bikye, omuri aga magara, ebi oremirwe, Betty. Hati, nk'oku dokita yaakureeba o-omu mubiri gwawe, niinyenda kureeba omu magara. Orahemukiire Ruhanga, ahantu hoona, Betty? Ku haraabe hariho, Kimwaturire oti, "Mukama, ku Oraakinsinguze ogundi murundi, niinyenda . . . Ninja kutwaza okundi." [Ow'eishe-emwekazi Betty Daugherty yaagambira Ow'eishe-emwe Branham -Omur.]

113 Mugyenzi! N'ekintu ky'omutaano. Ka tukiteekateekyeho omuringo ogu. Hati, mbaire ntarikumanya ngu Betty Daugherty abaire naaza kuba omuri oru ruteerane. Kwonka ow'okubanza, omu kumanya ebiri omu mitima y'abantu kwangye okundi, akaba ari Betty Daugherty. Nkiki hanu, kyagaruka ogundi murundi, aha ruteerane rw'okubanza ahari eki.

Yaamanya obwire obwo bwonyini eki naaba ningambaho. Tindikwenda kutandika okwo kumanya ebiri omu mitima y'abantu ogundi murundi, 'habw'okuba, omu runyiriri. Kwonka yaagamba eki yaaba ashemereire kugamba hati hati. Akaijura Omwoyo Orikwera, ebiso-ebiso okwo omuri St. Louis. Nk'omwishiki ensinganto, omwana muto, obundi akozire ebintu ebi atashemereire kukora. Kwonka shi, n'oha otabikozire? N'oha otabikozire? Zaaba zitari mbabazi, twena tubuzire. Kwonka ku oraabe oyeteekateekire kweteisa enshobe zaawe, Ruhanga n'ohikiriire, okukusaasira enshobe zaawe.

114 Niinyimutsya okwikiriza kwangye hati. Mukama, nindeeta omwishiki ogu Ahariiwe. Ninta engaro zangye aha riisho rye. Ninkabukira obu burwaire oburikuhumya amaisho, kandi niinyikiriza ngu Betty naaza kugaruka areebe. K'Amaani agaahumwire amaisho ga Batimaayo empumi, gahumuure na Betty areebe ogundi murundi, obwo ndiyo nimpayo eshaara egi, obu nkiine okwikiriza. Omu Iziina rya Yesu Kristo, Omwana wa Ruhanga. Nkaabaasibwa ki ngaruka nkwata omu ngaro z'ow'eishe-emwekazi mugyenzi wangye, omu gundi mwanya, eriizooba, nyencakare, nari obwire bwona obu kiraabeho. Reero ago maisho marungi gandeebe, agire ati, "Ow'eishe-emwe Branham, nimbaasa kureeba kurungi nk'oku naabaire ndeeba omu biro byona by'okwega kwangye." . . . ? . . .

Noikiriza ekkyo, Ow'eishe-emwekazi Daugherty? [Ow'eishe-emwekazi Daugherty yaagira ati, "Eego." -Omur.] Okwo nikwo kiraabe. [Abateeraine baayesiima.] . . . ? . . .

Mukama, omu Iziina rya Yesu, Omwana wa Ruhanga, ha ow'eishe-emwekazi mugyenzi waitu eki omutima gwe gurikwetenga, obwo ariyo ayeteekateekire kuhurira kuruga Ahariiwe. K'Amaani agaakirize Betty Daugherty, omurundi gw'okubanza, kandi n'ogwa kabiri ogu nagwo. Ka gatambire ow'eishe-emwekazi mugyenzi waitu, omu Iziina rya Yesu. Amiina.

115 Ow'eishe-emwe. [Ow'eishe-emwe ogwo yaagambira Ow'eishe-emwe Branham -Omur.] Ow'eishe-emwe mugyenzi waitu naayenda kujunwa. Nooyakiira Yesu Kristo nk'Omujuni waawe? ["Eego."] Noikiriza ngu Akakufeera, kandi yaagaruka yaazooka? ["Eego."] Hati Noomwatura nk'Omujuni waawe? ["Eego."]

Omukristaayo n'abandi Bakristaayo, omu Iziina rya Yesu Kristo, ka buri kibuuzo ky'ekibi kirugye omu biteekateeko by'ogu mushajia. Ninshaba ngu ow'eishe-emwe mugyenzi waitu aheebwe Omwoyo Orikwera. Okuruga hati, tambura orugyendo rw'amagara g'Omukristaayo n'abandi Bakristaayo, omu Iziina rya Yesu Kristo.

Hinduka oranzye abateeraine aba, ogire oti, "Niinyakiira Yesu nk'Omujuni wangye." [Ogwo w'eishe-emwe yaagira ati, "Niinyakiira Omujuni." -Omur.] Ashemereirwe munonga ahabw'okuba ebibi bye byasaasirwa ahabw'Eshagama ya Yesu Kristo. Ekyo nikyo turikukunda, amiina, okutambirwa kabiri. [Omwanya oguriho busha aha rutambi rw'amaraka.]

116 Kandi naakora bingi, akasheeshe aka, ahabw'Obutumwa obu naaba nyine kandi n'ebintu ebi naamanya. Naakuratira okutumwa, munonga, okukira oku nkozire omu myaka etaano ehangwire, ahabw'okuba nzoire okukunda kwa Ruhanga kwonyini.

Hati, nikibaasa kungumira okuhinduka kuruga omu buheereza bumwe kuza omu bundi. Kwonka, ti kuhindura obuheereza. N'okutwara obwo buheereza bumwe omu kyanga ky'ahaiguru okukiraho. N'okutumwa kw'okubanza. Ebintu ebindi ebi byona bitwire nibyombekyera ahari ekkyo. Hati obu nibwo bwire.

N'omutima gwangye gwona, ndiyo niinyikiriza buri muntu ou ndikushabira. Niinyikiriza ngu nibaza kukira. Kandi n'obuhame bwona obu twine, byona ebi Ruhanga ayorekire, ebya buri mwaka, eby'obuhame obutarikuremwa, obwa Baiburi kugaruka ekaba ehuriire, mbwenu Nikibaasa kuremwa kita? Tikirikubaasa kuremwa.

117 Hati, hariho omuringo gumwe gwonka gw'okutuma Kyaremwa, ogwo ni, iwe kuremwa Kukiikiriza. Yesu ku yaakwemerera hanu We wenka haza akakushabira, kandi okaraba omu bikorwa nibyo bimwe ebi twakora akasheeshe aka, tihariho ebirengireho ebyakubaho. Nimmanyisa, ku waakwikiriza n'okwikiriza okurikwingana, ngu, tihariho ebirengireho ebyakubaasa kubaho okukira ebiraabeho, ku oraikirize n'okwikiriza okurikwingana nakwo. Ahabw'okuba, nyowe nimmujwekyera kwonka. Ndi omusiisi ojunirwe ahabw'embabazi, omuntu nkaiwe, omuntu-buntu. Kwonka Ruhanga naateekwa kugira ahu yaagira ow'okugambiram. Kandi ekkyo Akihamize

n'Ekigambo Kye. Akihamize kurabira omu buheereza. Akihamize na Maraika wa Mukama. Mbwenu nkiki hanu. Hati kiri ahariitwe, kukiikiriza.

Hati mwijukye, nk'omwana. Ku oraabe otwire oine obusaasi, otagaruka kubuhurira. Ku oraabe otwire orwaire, egyo ndwara tekiraho. Yehuzye obumanyiso bwona, ekintu kyona ekirikuhanisa eki waashaba. Emirundi mungi . . . Buri mwana oija ahari Ruhanga, naateekwa kugyezibwa. Nitugyezibwa, okureeba ku turaabe nitwikiriza ekyo, nari tutarikukiikiriza. Kandi nimuza kugira engamba n'emirabanamu. Kwonka, mwijukye, turi omu rugyendo rwaitu.

118 Ruhanga abahe omugisha. Nimbakunda. Kandi nyowe, ahabw'okuhwerwa Ruhanga, nyine amatsiko ngu Naaza kuunyikiriza mbaheereze, nk'omuheereza We, okumara emyaka, mungi munonga erikwija, nikwo kushaba kwangye. Munshabire.

Kandi hati mwijukye, ekiro eki, Ebintu Bitaano Ebihikire Ebirikuhamya Ekanisa Y'Amazima Ya Ruhanga Ohuriire. Okuhitsya obwo . . .

Ka twemerere, aha maguru gaitu, akaanya kakye.

Oo, hariho saaviisi y'okubatiza? [Ow'eishe-emwe Neville yaagira ati, "Nintekateeka ngu eriho. Ka tureebe yaaba etanka . . ." -Omur.] Oo, saaviisi y'okubatiza! ["Nituzu kugiraho okubatiza."] Abantu abarikwenda kubatizibwa, muri hanu? Yereeza omukono gwawe, weena orikwenda kubatizibwa. ["Hariho oriho."] Omwe, babiri, bashatu . . . Eego. Munsaasire, munonga, munonga, banywani.

Hati, ahari abo abarikwenda kugyenda, naaza kubasiibuura. Abandi batsigare ahabw'okubatizibwa, abarikwenda kubatizibwa. Twineho saaviisi y'okubatiza, omu kaanya kakye.

119 Taata Ruhanga, siibuura abo abarikwenda kugyenda, n'omugisha Gwawe, omugisha Gwawe. Embabazi Zaawe zibagume, Ninkusiima ababwa byona ebi waakora akasheeshe aka, obwo turiyo nituruga aha rushozi, twatandika kwinamuka. Mukama, ninshaba ngu twinamukye nituraba omuri buri itembezo ry'ekyanga, okuhitsya obu turaahikye o-omu Bukama bwa Ruhanga. Kituhe, Mukama. Guma naitwe hati. Saasira ekibi kyaitu, abo abarikwenda kuguma hanu hati kubatizibwa ahabw'okusaasirwa ebibi byabo, omu Iziina rya Yesu Kristo. Ninshaba ngu tuheebwe ebinto ebi.

Garuka oturundaanire hamwe, ekiro eki. Ninshaba ngu amaani Gaawe n'emigisha Yaawe bitwijeho, ekiro eki. Ka tugire ekiro kirungi ekiro eki. Ninshaba ngu baingi, abacuramiriirwe, bagororwe, ekiro eki. Kituhe, Taata, ahakuba twakishaba omu Iziina rya Yesu. Amiina.

Kare. Nimubaasa kushutama hati ku muraabe nimwenda, obwo turiyo nitweteekateekyera okubatiza.



Obutumwa obu bukabuurirwa
William Marion Branham
"... omu biro by'eiraka ..." Kush 10:7